

Via Afrika Siswati Lulwimi Lwasekhaya



Via Afrika

Our Teachers. Our Future.

Libanga 11 Study Guide

F.M. Armooh, B.B. Malangwane



Study Guide

Via Afrika Siswati Lulwimi Lwasekhaya

**Libanga 11
Inkhombandlela yemfundzi**



Our Teachers. Our Future.

Lokucuketfwe

Singeniso	4
Sehluko 1 Inchubo yekubhala	5
Sehluko 2 Tindzaba netibonelo tato	8
Sehluko 3 Emathekshi emibhalombiko	17
Sehluko 5 Liphepha lelisibonelo nemarubriki	38

Singeniso

Inhoso yalensitakufundza kwelekelela bafundzi ekubhaleni ematheksthi ekuticambela ngemphumelelo ngekulandzela ticondziso lebanikwe tono, baphindze bakwati kutihlolela imisebenti yabo. Bafundzi batawukwati kubhalela tinhlosongco, timongcondvo, netetsamelilwati letehlukahlukene basebentisa timiso letibekiwe telulwimi lolunotsile lolwemukelekile.

Lensita ihlelwe ilandzela luhlelo Iwekufundzisa bafundzi belibanga 11. Ifundzisa lokucuketfwe, indlelanchubo, timiso tekubahala kanye netakhi netimiso telulwimi lokumele ticikelelwe ekubhaeni nekwetfula kanye nekufundza nekwehlwaya njengoba kubekiwe eSitatinendeni Senchubomgommo Yavelonkhe yekharikhulamu nekuhlola.

Kuleso naleso sehluko kucalwa ngekuchaza timiso netidzingo taleyotheksthi yekuticambela, inchubo yekubhala kulandzele sibonelo, umsebenti wekutihlola lohambisana nensita yekuhlola lomsebenti latikhicitele wona umfundzi, kute atewukhona kulungisa emaphutsa ngendlela lefanele.

Lensita yentelwe kutsi umfundzi akhone kutisebentela yedvwa atilungiselela liphepha lesitsatfu nelesibili leluhlolo IweSiswati Lulwimi Lwasekhaya Libanga 11. Ngiyakholwa kutsi lendlela lena yekutsi umfundzi afundze ngesibonelo itawucinisekisa kutsi bafundzi baphumelela ngemalengiso ekufundzeni nekwehlwaya kanye nekubhala nekwetfula ngoba kufundza ngekubona kwenta umuntfu akhone kubona kutsi ngempela lentfo lokutsiwa akayente, iyenteka.

Sehluko 1 Inchubo yekubhala

Nasibhala silandzela lenchubo lelandzelako:

1 Kuhlela nobe kulungiselela kubhala

- Ngembi kwekubhala umfundzi
- Utsatsa tincumo ngenhloso
- Tetsamlilwati tetheksthni lekumele ibhalwe.
- Utfola acikelele tidzingo tesakhiwo nesitayela
- Utfola imininingwane ngesihloko ngekusebentisana nebangani
- Wakha libalavengcondvo
- Wenta lucwaningo ngekusebentisa imitfombolwati leyehlukahlukene.

2 Kubhala iuhlaka

- Umfundzi kumele asebentise imibono lemcoka nalesekelako layitfole nakahlela umbhalo. Ubhala imkhicito wekucala acikelela inhloso, tetsameliliwati, sihloko neluhlobo lwenzaba.
- Ufundza tinhlaka talabanye ngekutihlatiya, kute atfole imibono yalabanye
- Cikelela kutsi emagama uwakhetse kahle yini, ngabe kuyahambisana nenhloso, tetsameliliwati neluhlobo lwembhalo.
- Naka kusetjetiswa kahle kwetiphumuti nelulwimi lolulungile.

3 Kubuyeketa, kuhlela kabusha, kulungisa emaphutsa nekwetfula

- Umfundzi usebentisa umgomo lobekiwe wekuhlola umsebenti wakhe nalabanye (irubhrikhi.)
- Phindza ufundzisise ulungise lapho usebentise ligama lelingakalungi kahle, nobe uma utfola lelingabeka umlayeto kancono. unganeta lwati lolusilele.
- Khapha emagama lamakhulu nobe lawo langahle adide tetsameliliwati.
- Hlola lupelomagama, nekusetjentiswa kwetakhi netimiso telulwimi, njengetivumelwano tenhloko netamentiwa, ngabe kusebente ngendlela lenganamaphutsa yini.
- Lungiselela umkhicito wekugcina, wubhale ubete emaphutsa
- Yetfula umkhicito wekugcina longanamaphutsa.
- Ake sibuke nati ke Takhi netimiso teskusebentisa lulwimi lekumele siticikelele nakubhalwa.

4 Kukhetfwa kwemagama

- Emagama ngiwo lasetjetiswako kute sikhone kubona inhloso yembhalo, tetsameliliwati lokucondzenwe nato ngako kukhetfwa kwawo kudzinga buciko lobukhulu.
- Kumele sisibentise tinhlobo letehlukene tetento letinemnyakato lohambelana nenhloso yalokubhalwa ngako, tipawulo netandziso letikunika imicondvo nemininingwane letsite nekuchaza ngalokucacile nakubhalwa. Sibonelo emagama lakhetfwa nakubhalwa indzaba lechazako kumele asente sibone lesifombe salokukhulunywa ngako, sicacelwe kutsi kunambitseka njani, kuyatsandazeka nobe kuyenyanyisa.
- Kuba nelwati lwekutsi kumele usebentise lulwimi loluhlelekile nalolungakahleleki kuye ngetidzingo teluhlobo lwembhalo.

- Kukhona kubeka emaciniso nemibono ngendlela lelandzelekako.
- Kusebentisa emagama ngenhloso yekuveta umcondvolosobala nobe umcondvolojulile kuhambisane nesimongcondvo.
- Kusebentisa tinsita temitfombolwati neticukatsi lwati
- Yati tetsamelilwati takho. Lolwati lolu luyakusita kutsi ukhetse emagama ngekucophelela kute umlayeto wakho ufinyelele kahle ngalokuvakalako kutsintseke imiva nekucabanga kwaleso setsamelilwati sakho.

5 Kwakhiwa kwemisho

- Kumele sibhale tinhlobo letehlukene temisho letinebudze lobehlukene.
- Kusebentisa titfo tenkhulomo ngalokufanele
- Kusebentisa inhloko, sento, mentiwa, tikhatsi tesento netindlela tesento kuvuma nekuphika, simokwenta nemphamphosi yekwentiwa
- Kusebentisa tibuti
Kusebentisa tinhlobo letehlukene temisho, lesasitatimende, lebutako, lecondzile, lembici, lemegalagala nailembici magagalaga
- Kusebentisa tihlanganiso, tabito, tandziso, kwakha imisho lehambelanako
- Kusebentisa tinhlobo letehlukene tetabito kukhombisa kugcizelela nobe kucatsanisa.
- Kusebentisa luhlelomagama ngalokulungile kukhomba kucatsanisa nekugcizelela
- Kusebentisa tivumelwano ngalokungenamaphutsa.

6 Kubhalwa kwetindzima

Indzima yakhiwe ngemisho leminyenti ledzingidza umcondvo munye.

Kucala umusho lonemcondvo lobalulekile (umusho loyinhloko) bese kulandzela imisho lenemicondvo lesekela lona lobalulekile.

Leleminye imisho yendlala lombono lokulomusho lobalulekile.

Umusho wekugcina (Umusho lophetsako) wendzima usonga konkhe lobekushiwo kulendzima.

Umusho wekucala wendzima lengenhla kufanele ube nebuldelwane nendzima lelandzelako kutekutewuba nekutselelana kwemicondvo. Indzima lephetsako ayifinyeti

Lokuchumana kwemicondvo kungenteka ngekusebentisa emagama lachumanisa tindzima nobe kubeneligama lelinebuldelwane naloku bekubhalwe ngako kulendzima lengenhla. Loku singakucinisekisa ngekusebentisa timphawu nobe tihlanganiso nemabintana lalandzelako:

- Kukhomba kuhleleka- Kwekucala, kwesibili, kwesitsatfu, ngembikwekutsi, emvakwekutsi, ekugcineni, lokulandzelako.
- Inchazelo/ imbangela/ nemphumela ngako-ke, bese, ngaloko ke, ngobe, ngaleso sizatfu, kusukela, ngenca yaloku, kusho kutsi.
- Inchubo: Kwekucala, kwesibili, kwesitsatfu.
- Kucatsanisa - Kufana, kwehluka kuncane

7 Irejista, sitayela, nembono

Kusebentisa irejista lefanele, lehlelekile nobe lengakahleleki.

8 Timiso telupelomagama

Nasibhala asibuke kutsi sisebentisa bofeleba, emakhefu, bokhulunyiwe, emakholoni, kudvwebela, kubhala ngalokutjekile, emasemi-kholoni, Khefana,i-Hayifeni, emadeshi, luhawu loluveta Iwati lolwengetive

Kusebentisa Iwati nemaphethini nemitsetfo yekupela uma apela emagama ngalokungenamaphutsa

Kusebentisa tindlela tekufinyeta nema-akhronimi ngalokufanele

Lwati lwemisuka, ticalo netijobelelo.

Tintsatfu tinhlobo tetindzaba letifundvwako kulelibanga

- Indzaba lelandzisako
- Indzaba lechazako
- Indzaba lehlangotsilunye

Nasibhala letindzaba kumele sisebentise naletakhi netimiso telulwimi letibalwe lapha ngenhla.

Ematheksthi emibhalombiko lafundwako

- Incwadzi yemtsetfo
- Incwadzi yebungani
- Luhlelo lwemhlangano nemaminithi
- Inkulumo, inkulumiswano nenkhulumoluhlolo
- Umbiko (lohlelekile nalongakahleleki)
- Sihlatiywa
- Sihlelwa
- i-athikili yeliphephandzaba
- i-athikili yeliphephabuku
- Umlandvomphilo
- Umlandvomufi.

Sehluko 2 Tindzaba

Tinhlobo tendzaba

1. Indzaba lelandzisako
- 2 Indzaba lechazako
- 3 Indzaba lehlangotsilunye
4. Indzaba lesuselwa kusibonwa

1 Indzaba lelandzisako

Lena yindzaba lelandzisa kabanti ngesehlakalo sesihloko lanikwe sona umfundzi.

- Ilandzisa negetigameko letilandzelana ngendlela letenteka ngayo, nobe ucale ngalokwagcina ngako.
- Lena yindzaba lecanjiwe kepha lenekukholweka
- Sikhatsi lesisetjentiswako sikhatsi lesengca, kepha lonelikhono lekusebentisa sikhatsi sanyalo angabhala ngaso.
- Inkhulumongco yenta lendzaba ikholweke, kubika kuphela kwenta ingahehi lendzaba.

Nasibhala silandzela inchubo yekubhala njengoba ichaziwe ekucaleni.

Sitawutikhumbuta ngekwetfula tihlokwana tayo lenchubo.

- Kuhlela
- Kwenta luhlaka
- Kubuyeketa nekuhlela kabusha
- Kulungisa emaphutsa
- Kwetfula.

Sakhiwo kumele kube ngulesi lesilandzelako:

Indzaba yakhiwe ngetindzima. Indzima ngendzima yakhiwe ngemisho letsite.

Kunaloyihloko naleyo lesekkelako nalowo lophetsa indzima. Tindzima kumele titselelane emanti ngekusebentisa tihlanganiso nobe emagama latsite laletsa kuchumana.

Tindzima tingaba singeniso, umtimba nesiphetfo

Singeniso

- Siba sifisha
- Siyaheha
- Asiteki indzaba yonkhe, setfula loko lokutawukhulunywa ngako.

Umtimba

- Tindzima tiba tinyenti emtimbeni
- Indzima ngayinye ngayinye kulomtimba ineliphuzu lelibalulekile nemininingwane lesekkelako.
- Sichubekela kulenyne indzima uma sewubhala ngalelinye liphuzu.
- Asihlanganisi emaphuzu langahambelani.

Siphetfo

- Asicaphele, asiphindzaphindzi loku lokusemtimbeni.

- Sisonga ngekunika umcondvo, umbono nobe sifundvo lesitfolakele endzabeni.

Asicapele naku:

Budze bendzaba kulelibanga ngemagama lali-240- 290. Ake sifundze nasi sibonelo sendzaba lelandzisako.

Latishonela tigebengu kamagolide nesiliva!

BekunguMgcibelo, tikolo bekukudzala tavalwa. Bengisedolobheni eJabulani Nonkhe, ngiphekeletelwe ngudzadzewetfu lomkhulu Gcebile. Ngangiyewutsengela umngani wami siphophela bekatawugubha lusuku lwakhe Iwekutalwa ngakusasa ngeliviki lelilandzelako.

Edolobheni imbita beyiviwa ngelutsi. Bantfu bebehla benyuka netitaladi telidolobha. Leso naleso sitaladi sasinesicuku saso. Timoto tona tatiphambana, letinye tatiya enhla, letinye tatiya entasi letinye tatijika emakhoneni. Bekungamangalisi ke kuva sekukhala emabheli ngoba phela labanye bantfu abaketayeli kuya edololobheni, bebahle batikhandza babambe ibhonethi yemoto ngesandla. Nami bengikuleso siphitsiphitsi.



Ngawela sitaladi, ngacondza kamagolide nesiliva. Lesitolo sasisandza kuvulwa lapha edolobheni lelikhulu laseJabulani Nonkhe. Lapha ngekhatsi bantfu bebanyatselana. Ngulowo atsenga tidzingo takhe.

Kwakutsengiswa emacici, emawashi, netindandatho letakhiwe ngegolide, isiliva, nedayimane. Imali yona bengiyonge kusukela ngaBhimbidvwane, beseyenela kutsi ngingatsenga siphophela lesibita emarandi lange-500.

Sangena ekhatsi estitolo naGcebile. Sandla sami sasinkonkoshele sikhwama, ngani bayasho kutsi ayikho inkhokhelo yemtfwalo lolahleka uhamba nemnikati, kantsi kuyatiwa kutsi tinswelaboya tigcwele nakuphela inyanga. Satsatseka kulelinye liwashi belakhiwe ngekuhlanganisa ligolide nesiliva. Ngalibona ngemehlo engcondvo limengetela esandleni semngani wami. Ngatsi ngisekulowo mcabango ngeva ngishiywa ngumtimba.

Ngabona emadvodza lamabili lagcoke tembatfo letimnyama netigcoko letimbonya bonkhe buso kusale emehlo kuphela. Ngema ngatsi khwimilili. Tigebengu!

"Lalani phasi nonkhe, ningasibuki!" Kwasho livi lelitfusako liphuma kulendvodza lemfishane.

"Hhay! Abangalali phasi, kepha abeme lapha elubondzeni banamatsele baphakamise tandla, lotawulokotsa nje akhulume namakhalekhikhini, utalibuka aligcine," kwasho lendvodza lendze. Seva lawo mavi, senta lesatjelwa kona.

Bachubeka bayo kumunye webatsengisi, batsi akaletse yonkhe imali lekhona aphindze atfulule bonkhe bucwebe abufake kuletikhwama tagawini bebatiphetse.

Nembala umntfwanebantu wenta njalo. Ngatsi ngitsi nhla ngabona batsatsekile ngoba imali labayitfola yayiyinyenti kakhulu. Ngabona leliney likinobho lolichafatako uma nihlaselwa tigebengu. Tinhlitiyo tami taba timbili. Lenye yatsi angichofote lenye yatsi kumbe ngitigubhela lithuna lami. Ngawucitsa lowo mcondvo wesibili. Ngadzela imphilo yami. Ngachofota. Ngesikhashana nje babe sebafikile baka *Hi-Tech*. Taphaphama batifasa ngabozankosi. Kwabe sekuya kwato esitokisini njalo.

Ngakusasa kwavela ephephandzabeni „Tindzaba Tetfu“ kutsi “umfana wase Takheleni ube lichawe ngesikhatsi elekelela ekubanjweni kwetigebengu letiyingoti”. Ligama lami abalikhphanga ngoba bangafuni kufaka imphilo yami engotini. Ngeva babe sekatsi “Ngumfana wami ke loyo.

Umsebenti

Bhala indzaba ibe ngemagama langabi ngephasi kwe-240 kepha angabi ngetulu kwe-290 ngalesihloko lesilandzelako:

Landzisa ngalokwenteka mhla nihlaselwa tigebengu ekhaya kini. Landzela inchubo yekubhala njengoba yetfuliwe ekucaleni kwalesehluko

2 Indzaba lechazako

Indzaba lechazako ingumbhalo losebentisa emagama lakha sitfombe salokuchazwako. Likhetselo lemagama endzaba lechazako alilandzisi kepha likubekela lentfo uyibone ngemehlo engcondvo kutsi inembala lonjani, ivakala njani nawuyitsintsia, ihogeleka njani uma ineliphunga, inambitseka njani, ibukeka njani, ivakala njani njll. Uma umbhali aphumelele kuchaza intfo letsite angakwenta umamatseke, uhleke, ufise kutsintsia, ufise kunambitsa, ugwinye ematse, uhlante, nobe utfutfumele, kuye ngekutsi inhloso yakhe bekutsi kutsintseke mphi imi yalofundzako.

Indzaba lechazako ingumbhalo wekuticambela ngentfo loyicabangako nobe loyibonako. Uma ubhala indzaba lechazako, nayo iba nesakhiwo njengayo lenalelandzisako kepha yona ayigcili kakhulu etigamekweni, inamatselakakhulu ekukhombiseni ngalokusobala kutsi intfo ibukeka njani, ivakala jani, inambitseka njani, ihogeleka njani.

Kubalulekile kutsi umbhali asebentise sikhatsi sanyalo uma achaza. Cishe letinyenti timiso netinyatselo tekubhala tiyafana nendzaba lelandzisako" kakhulu ekwakheni imisho, silulumagama nekusebentisalulwimi lolunotsile.

Yini lesingayichaza?

Singachaza tintfo, bantfu, tilwane, takhiwo, tigameko, timo, netindzawo.

Ake sibuke nati tindzinyana letilandzelako kute sibone umehluko emkhatsini wekuchaza nekulandzisa.

1. Kwaba nemoya lomkhulu. Lelitulu vele belilibi kakhulu lesabeka. Bantfu abatange baphatseke kahle ngalesikhatsi babona lelitulu lelalita ngemandla. Tinja takhala tabaleka tayewubhaca.
2. Umoya wawuhlabelela ingoma yentfukutselo. Tihlahla tatitila tisima kalukhuni lapho umoya utidlelela ngemandla.

Kwakhephutela emafu lamnyama lakwenta uvume tono. Ashulungana, kwagubhutela ematfumbu kubolaluvadlwana. Umbani waklaya kuleso sibhakabhaka lesintima khwishi! Walandzelwa kudvuma lokwaba ngatsi kugicitwa imigcoma letinkhulgungwane. Kwabandza ematfunjini etakhamitini takulendzawo letakhe emadlokowana. Tinja kwaba buklewu klewu, tigoce imisila tifuna tindzawo tekufihla tinhloko, tibona kutsi lamuhla litishonele. Kwachuluka timbokodvo tematje! Uma sibuka letindzima lettingenhla letimbili yini umehluko lokhona? Nguyiphi lelandzisako futsi nguyiphi lechazako? Sekela timphendvulo takho ngekucaphuna endzimeni.

Uma ngabe utse leyekucala iyalandzisa, uphendvule kahle, leyesibili iyachaza. Ikwenta ubone ngemehlo engcondvo kutsi kwakwentekani, uyawuva lomoya ngetindlebe uhhusha, uyatibona naletihlahla tisiphalata, uyatibona nobe setidlelelwia ngulomoya ngemandla setigcina tisiphuka timphandze, uyeva, wetfuke, wesabe ngalendlela lesimo selitulu lesichazwe ngayo. Ake sibuke nasi sibonelo sendzaba lechazako. Bhala indzaba uchaze umngani wakho lomtsandzako ucacise kutsi yini leyenta umtsandze.

Emphilweni akukafanele umuntfu abe yinkhomo ledla yodwya. Nami nginemngani lomuhle lengimtsandzako losifuba sami futsi longikhutsatako uma nginetinkinga. Unebuso lobuyingingilizi. Unelibala leliluhlata lelitsandzekako. Sikhumba sakhe

sibusheleleti ngatsi seluswane. Unemehlo lamhlophe futsi lamakhudlwana kunalawa ami. Uneminyaka lelshumi nakune kepha uma umbuka ucabanga kutsi ingetulu kwaleyo. Unelitsambo ngoba ubalelwa kulabo labadze eklasini futsi usibukubukwana lesihle lesililambalidile. Unemilente lemidze lengatsi yebakhangisi betimphahla.

Uyayidla indvwangu umngani wami. Angeke nje umkhandze agcoke imphahla lemnyama lensundvu. Utsandza imibala legcamile futsi uyakwati kuyihlobanisa. Utsandza timphahla letibovu, letiluhlata, letimhlophe, letiliphuti nobe letibukhwebeletane. Pho uyafanelwa yini bo!

Angikamkhetsi ngoba amuhle ngesakhiwo, kepha lokwangidvonsa kuye kutsi ungumuntfu webantfu. Ngaso sonkhe sikhatsi uhlala ajabulile. Ngeke ukhandze acudvule umlomo. Akatsatsi tinkinga takhe atetfwese lomuye umuntfu. Ungumngani lonenhlitiyo lenhle, lohlakaniphile, locotfo, lonelutsandvo neluvelo. Uyatsandza kutsi lanako akusebentise nalabanye bantfu. Akasiye umngani lohlebanako nalonemona. Uma uke wahleba umuntfu kuye uyatisola ngoba utakubuta kutsi amtjele yini lona lokhulumu ngaye kutsi wena utseni ngaye.

Sibusisile ngumuntfu lotimiselako kuyo yonkhe info layentako. Akasiyo intfombatana levilaphako. Ukhutsele uhlala njalo enta umsebenti wesikolo. Kute lokumangalisako uma sekatfolu imphumelelo ngemalengiso kuto tonkhe tifundvo takhe. Etifundvweni tetibalo sonkhe sisitwa nguye. Ungafunga utsi unguthishela ngendlela lanesineke ngayo uma asichazela. Cishe sonkhe eklasini sesiyativisia tibalo ngoba uvele asitjele kutsi konkhe kusengcondvweni yakho, ungatsi tibalo tiyakwehlula vele titakwehlula, kepha ungatsi uyatikhona vele utawutikhona. Lamavi akhe asikhutsata kakhulu.

Phela lomuntfu unetiphiwo letinyenti, ekwayeni lesikolo uhamba embili, kantsi nakutemidlalo ukhona. Uye eGreece edolobheni le-Athens, waya nase Germany nase Australlia. Ulichawekati letemidlalo. Akabuyi nendondo yinye Ubuya netindondo tegolide, nakehlulekile utfola yesiliva.

Nabatisho labatatiko batsi wafuta batali bakhe. Nabo bebanemakhono lamangalisako basafundza sikolo. Abagcinanga ngekutsi bamuphe lolo futo lwekuhlakanipha nekukwati kndlala imidlalo, baphindze bamkhulisa ngendlela lefanele. Nobe Siswati sitsi akukho geza linganasiyela, kuSibusisile ungasiphikisa lesaga, ngoba phela uphila kungatsi akasiye umuntfu walapha emhlabeni. Sonkhe siyafisa kufana naye, usibonelo lesihle.

Umsebenti

Bhala indzaba lechazakako ngathishela lomtsandzako. Indzaba yakho ayibe ngemagama langabi ngaphasi kwe-240 kepha angabi ngetulu kweli-290. N.B Njengoba ubonile lapha ngenhla nawe sebentisa emagama lachazako.

3 Indzaba lehlangotsilunye

Kumele kutsi utsatse luhlangotsi, bese wesekelelово mbono wakho ngendlela letawuba neligalelo lelikhulu ekutseni bantfu bavumelane nawe esihlokweni lonikwe sona. Sihloko sendzaba letsatsa lehlangotsilunye sivame kutsi sibe nemibono leyehlukahlukene. Wena lobhalako ukhetsa lunye luhlangotsi,bese wesekele lowombono ngemaphuzu langemaciniso levakalako futsi lacacile.

Ungakhetsa sihloko sendzaba lehlangotsilunye, kubalulekile kutsi wente libalavengcoondvo neluhlaka kute utewubona kutsi unelwati lolungakanani ngalesihloko nobe loluhlangotsi lolukhetsile Iwesihloko.

Singeniso sakho kufanele sichaze kafishane ngesihloko siphindze sikhombise kutsi wena utawutsatsa luphi luhlangotsi futsi utayidzingidza islandzelane njani imibono yakho.

Ungayicala indzaba yakho ngembuto nobe ngetibalo telucwaningo letishacisako letitawukwenta bantfu basekele lowakho umbono.

Umtimba wendzaba yakho wakhiwe ngetindzima letesekela loluhlangotsi lolutsetse nato tinemisho lesekela leyo mibono lemcoka ngetibonelo, tibalo telucwaningo, nemaciniso latsatselwe elucwaningweni Iwesihlokolosikhetsile.

Tindzima takho kufanele titselelane emanti ngekusebentisa emagama ekuchumanisa tindzima lakhomba kwenta, kufaka umbono lowehlukile nobe kukhomba kuphetsa umbono wakho kuleyondzima.

Imibuto lengadzingi timphendvulo nobe imphindvwa ungayisebentisa ekutseni uphocelele tetsamelilwati kutsi ticabange njengawe.

Siphetfo asibe sifisha, sigcizelele luhlangotsi lwakho kute kuhlale njalo kukhumbuleka kutsi lendlela lobona ngayo tintfo ingiyo sibili.

Ake sibuke nasi sibonelo sendzaba letsatsa luhlangotsi

Bafundzi abatsandzi kutsi babanikwe umsebenti labatawenta ekhaya. Labanyenti batsi akuyekelwe kunika bafundzi umsebenti wasekhaya. Utsini umbono wakho ngalesihloko? Umsebenti wesikolo lowentiwa ekhaya uyinceny lebalulekile yekufundza kwetfu tsine bafundzi. Ngaleso sizatfu sifanele kutsi siwente ube sezingeni lelisetulu. Angivumelani nembono lotsi akuyekelwe kunika bafundzi umsebenti wasekhaya. Ngitsi abachubeke basinike kepha kunetintfo lekumele tilungiswe bothishela, batali nebfundzi kute kubete tihibe ekwenteni umsebenti wasekhaya.

Kwekucala nje umsebenti wasekhaya siwunikwa kute sitfole ematfuba lanetiwe ekwenta umsebenti wetfu. Lawo matfuba asisita kutsi sikhone kuvisisa loku besikwenta eklasini, kulesinye sikhatsi sisuke sicedzisa umsebenti lebesiwenta eklasini. Kwesibili, umsebenti wasekhaya wenta kutsi tingcondvo tetfu tikhone kubamba emakhono nelwati lolufundvwako ngekutsi sitentele sisodvwa nobe sisitwa batali betfu. Ngibekise nje, sifundvo setibalo sidzinga umfundzi kutsi ahiale njalo atiolonga ngekwenta tibalo letibalwa ngendlela lefanako naleti latifundze esikolweni sekusetjentiswa tinombolo letehlukile. Loku kwentelwa kutsi indlela yekubala umfundzi angayicageli kepha ayati. Umphumela wekungatilolongi kukhohlwa. Bancane kabi bantfu labeva info kanye, bayente kanye bese bayayibamba sikhatsi lesidze engcondvwjeni.

Kweneta esifundvweni setibalo, kunesifundvo setilimi. Lesifundvo sentiwa ngelizinga Lwelulwimi Lwasekhaya, Lulwimi Iwekucala Lwekwengeta neLulwimi Lwesibili Iwekwengeta. Nobe ngabe umfundzi ufundza ngaliphi lizinga, lokubalulekile kutsi akwati kulukhuluma, kulufundza, kulalela nekubhala nekwetfula. Phela bafundzisi angeke bakhone kusifundzisa onkhe emagama, tisho netaga letikulelo lulwimi, kudzinga tsine sibafundzi sitifundzele, sitilalelele sitibhalele, siphindze silukhulume. Umsebenti wasekhaya uyasita ke ekutfutfukiseni lawo makhono elulwimi. Uphindze usite nebatali kutsi batibandzakanye ekufundzeni kwetfu. Akukhatsalekile kutsi umtali ufundzile nobe cha, angaba neligalelo afundzile nobe angakafundzi.

Kuliciniso kutsi timo tasemakhaya atifani, labanye bantfwana abanganayo kahle indzawo yekufundzela ngoba balala babe banyenti ekameleni lekulala, labanye njalo bete lona likamelo lekulala, balala ekameleni lekuhlala. Kulesinye sikhatsi utfola kutsi kute litafula lekubhalela futsi kute nekwekukhanyisa. Leti timo atingabi tihibe. Bafundzi kumele batise bafundzisi kute kwentiwe sikhatsi sekwenta umsebenti wasekhaya uma sesiphumile sikolo. Loko kungacugcutela bafundzi kutsi bakhone kusitana.

Ngakulolunye luhlangotsi ,sikolo naso kumele sidlale indzima yaso. Bafundzisi kumele bahlangane bahlele kutsi bafundzi batabanika imisebenti lenganani ngeliviki. Esikhatsini lesinyenti utfola ngulowo nalowo mfundzisi anika bafundzi umsebenti lomnyenti ngelilanga linye. Sgcine tsine bafundzi singakhoni kulala kantsi ekuseni kumele siphindze sibyele kuyewufundza cishe lilanga lonkhe. Bese asiseva lutfo ngoba sisuke singakalali.

Sengiphetsa, sibafundzi asiyekeleni kuvilapha. Wetfu lomsebenti. Asiyekele nalokukopisana, akusisiti. Phela umhlaba ukhungetwe tinkinga letinyenti. Angeke sibe yincenyenya yaletisombululo uma ngabe singatichamukeli nemibono lemisha ekufundzeni kwetfu siphike kutsatsa kwalabanye. Umsebenti wasekhaya awungayekelwa. Ubalulekile ekufundzeni kwetfu.

Umsebenti

Bhala indzaba nganasi sihloko lesilandzelako.
Kufanele yini kutsi bantfwana labasafundza sikolo batsengelwe bomakhalekhini?
Utsini umbono wakho?

4. Indzaba lesuselwa kusibonwa

Lendzaba lena isuselwa esifombeni losibukisisako, nobe igrafu, nobelithebula, utfole imininingwane letsite bese uynika sihloko lesitawuhambisana naloku lokubonako. Sibonwa kungaba sifombe, sikhangisi, emavi lacashuniwe, sikhangisi, igrafu, lithebula. Wena ungumfundzi kufanele ube nelikhona lekususa lwati egrafini nona esitfombeni luye emagameni.

Lokubhalako kufanele kuhambisane nalesibonwa. Ungachaza, ungalandzisa, ungatsatsa luhlangotsi. Sibonelo: Bhala indzaba ubhekise kulesibonwa lesilandzelako:



Ngifundza inoveli yami. Ngihleli kuveranda wendlu yakitsi lesitez. Ngiva umoya loshaya kamnandzi. Ngiybeka phasi ngoba ngifuna kubuka timvivane letimibalabala. Tinyoni tintjilota kamnandzi ngemaphimbo ato. Nangibuka lapha ekudzeni etintsaben, ngikhangwa buhle betintsaba taseGraskop letimagelemba lamahle. Sibhakabha sihle siluhlata futsi site ngisho linye lifu.

Ngitusa buhle bemvelo kantsi lapha ngemva kwendlu kucubuka emafu lamnyama khwishi. Akhephutela ahamba ahlanganisa sibhakabhaka. Ngesikhashana lilanga lafiphala netintsaba tangabe tisabonakala. Liyadvuma ngiyagcuma ngiya etulu. Ngivala emafasitelo kute umoya ungangeni endlini. Nangiphuma ngaphandle simo sesishubile sibili. Tihlahla tidansa tibuye tishaye inkhwela. Tintsambo tagezi nato tiyagcumagcuma ngoba umoya sewuhlabelela ngemandla. Sibhakabhaka phela sesimnyama khwishi, sisindvwa ngemafu emvula. Ematfonsi labuhlungu ehla kabili katsatfu kwase kulandzela timbokodvo tesitfwatfwa. Umoya utfukutsela kakhulu, uhamba udzimula tihlahla letinkhulu, tisiphuka netimphandze tato. Lapho ngihlahla

emehlo abangangewesicoco ngoba labadzala abakabuyi emsebentini. Lidvuma liphosa nembani lophandla emehlo nje ngingedvwa.

Nasi sigcobo sagezi siwa. Ngiyavelelwa, utawuhamba gezi ngitawubayini na? Angikalimiti, nango gezi ahamba. Ngiphumphutsa likhandlela, ngiyakhanyisa. Nangitsi ngiklwebha umetjiso liyadvuma ngizuba ngiya etulu kuwa umetjiso lowo. Angikabuti elangeni, ngiva kugwabuka emathayela akamakhelwane. Ngisahlola ngibona nalawa akitsi aphapha emoyeni kuhle kwendizamishini. Ngitfwala tandla enhloko angidzindza ematje.

Wo yenteka indzaba lenkhulu. Timphahla tasendlini tiyanetfwa. Ngitawubalekela kuphi ngoba namakhelwane ukhala bumayemaye. Ngingena ekhatsi lakuhlala timphahla khona ngiyabhaca. Ayangena emanti ngebuningi. Kuyatsamba konkhe lokulapha endlini. Imibhedze, tingubo, emakhabete, emabhuku ami, nemabhuku emndeni wonkhe. Ngitsi ngilalele ngiva make uyamemeta." Hhawu mine ngemntfwanami, hhawu mine ngendlu yami ngitawushonaphi, name ngacala ngakhala kantsi bengisolo ngetfukile kungaphumi nenyembeti ngoba konkhe kwaba ngatsi ngiyaphupa. Nakangiva ngikhala wathandaza abonga kutsi ngiyaphila. Ukhipha makhalekhikhini ushayela malume kutsi asilandze. Uyasilandza, siyahamba siya ekhaya lakhe, kute lesingakhona kukusindzisa ngoba konkhe kutsambile. Sengimajokololo ngoba nayo imvula solo ayikatibeki phasi. Landleleni akuhambeki ngenca kunemadamu emanti, tihlahla tiwele ekhatsi emgwacweni akubukeki. Siyafika kaMalume, cha khona kungotimakhata. Ligcobile kepha abakapheshukelwa tindlu. Ngeke ngilikhohlwe lelilanga letimanga.

Umsebenti

Fundzisia lesibonwa lesilandzelako bese ubhala indzaba yakho. Emagama angabi ngaphasi kwe-240 kepha angabi ngetulu kwe- 290.



Sehluko 3 Ematheksthi emibhalombiko

Tincwadzi tebungani

Kunetinhloso letehlukene letisenta sibhale tincwadzi tebungani njenganati letilandzelako:

- Isimemo
- Kubonga
- Kuhalalisa

Lokucuketfwe yincwadzi/sitayela

- Iyevakala futsi icondze ngco
- Ayisiyindze futsi igcila esihlokweni
- Iyahlonipha futsi icuketse lwati lolufanele
- Ayisebentisi sidolobha nelulwimi nje
- Ayisebentisi emagama lafinyetiwe

Tindlela tekufundzisa incwadzi

- Ayibe nesingeniso, umtimba nesipheto
- Ayibe nelikheli
- Ayibe nelusuku
- Indzima ngayinye ayimumamatse umcondvo munye

Tindlela tekubingelela

- Kugagula ngeligama
- Kusebentisa tihloko
- Kusebentisa sinanatelo

Tindlela tekuvalelisa

- Ngimi Indvodzakati yakho njil
- Ngimi umngani wakho

Sibonelo sencwadzi yebungani

P.O.Box 50
Nelspruit 1200
4 Mabasa 2011

Nokwanda

Batsi kwandza kwalliwa batsakatsi. Mine ngiswela nemagama lakahle lengingabonga ngawo longentele kona ngalesikhatsi ngitse shice etinkingeni emva kwekushona kwebatali bami.

Nabashona batali bami engotini ngabona ngatsi umhlaba sewufike ekugcineni kimi. Ngabatse ngenta loku ngatitfola ngingenako kujabula. Kwaba kulapho sengingena ecenjini lebangani labasebentisa tidzakamiva. Cha tona betingiyenga, ngive kungatsi tinkinga tami setiphelile, kantsi tingaphela engatini bekubuya konkhe kuhlupheka kwami. Kungako ngagcina ngifuna kutisebentisa siphelane. Ekucaleni bengite inkinga ngoba imali lengiyishiyelwe batali bami beyitindvodla. Yabese iyaphela ngoba sengiphilela tona letidzakamiva. Besengiyekele nesikolo. Bengibona kungatsi utsandza kugcumekela etindzabeni tami ngalesikhatsi ungibonisa.

Bengikubalekela, ngingafuni nekukubona. Kepha awutange uphele emandla. Wema njalo ungiyala ungibonisa indlela. Ungitjela kutsi imfundvo isikhiya semphilo angibuyelete esikolweni nekutsi kutinikela ekukholweni kungayisindzisa imphilo yami. Lengikubonga kakhulu kutsi ungilandzele beTenhlalakahle batewungeluleka ngebubi bekutsatsa tidzakamiva. Teluleko tabo tingisitile. Naku sengibuyelete esikolweni, futsi ngiphumelela ngemazinga lasetulu kuto tonkhe.tifundvo tami. Nemcondvo wami sewusangulukile. Sengiyageza ngibe muhle ngiyekele kuba tinsila. Impela ngiyawukukhohlwa ngifile. Nami sengiyawusita labanye! Lunwele loludze Khumalo, Mntungwa lomuhle kutinika sikhatsi ngami. Ngitawenta imitamo sibonane kute ubone kutsi vele teluleko takho tisebentile emphilweni yami. Bakhonte bonkhe ekhaya.

Umngani wakho
Sibonangaye.

Sibonelo sencwadzisimemo

P.O.BOX 30
Nelspruit
1200
10 Lweti 2011

Ncedzile

Ngibhala lencwadzi ngoba ngifuna kukumema kutsi utewuhlanganyela nemndeni wakits I kulomcimbi lotawube ukhona lapha ekhaya.

Umnaketfu Sati usandza kuphotfula etifundvweni tebudokotela eveni laseCuba. Imiphumela yakhe ibe mihle kakhulu kwendlula bonkhe bafundzi. Ute wafola umklomelo lobitwa ngekutsi ngumklomelo wemphatsi wenyuvesi lonikwa umfundzi lobashaye bonkhe.

Lomcimbi utawubanjela lapha ekhaya kitsi emakoko Ngalesihlanu ngensimbi yelishumi nakubili emini. Kutawube kunelithende lelikhulu leligcwala tinkhulungwane tebantfu. Kugcokwa timphahla letimhlophe. Phatsa lokunye lotakugcoka uma sesitijayivela.

Kutawucala kube nenkonzo yekubonga lapho kutawuba netinkhulumo, imilayeto yekuhalalisa. Emva kwaloko kutawudliwa, kutawube kusindvwe ngebelitfole. Ingani kuhlatjwe inkhomo kwaphindze kwacashwa nenkampani letawupheka.

Nasicedza kudla tsine labasha sitawubese siyakhululeka siyatijayivela. Phela kucashwe DJ Ziyaduma, uyamati ken awe kutsi usematseni kulamalanga. Fika mngani wami, ungalenti liphutsa. Buya ujabule natsi. Sesitawubonana ngalesihlanu khona emcimbini. Ngitakuhlangabeta esiteshini.

Ngimi umngani wakho
Salebona

Incwadzi yemtsetfo

Incwadzi yemtsetfo siyibhalela bantfu labakhulu, nobe lababalulekile ngalendlela tsite. Lulwimi lwayo lucocekile. Lukhomba kutsi anisibo bangani, nihlanganiswa simo lesitsite kute nibhalelane. Incwadzi yemtsetfo singayibhalela kubonga, kucela lokutsite, kukhonona, kwatisa,kutsenga, nekubika.

Lencwadzi yehlukile kunalena yebungani ngoba. Inemakheli lamabili.

- Lulwimi lwayo lucocekile.
- Sibingelelo sibhalwa ngekuhlonopha: Sitsi
- Mnumzane/Nkhosikati/Nkhosatana.
- Ngemuva kwesibingelelo sibhala sihloko salokubhalwangako kulencwadzi.
- Indzima yekucala isho inhoso yalencwadzi.

Tindzima letilandzelako tichaza kabanti ngenhoso yencwadzi, tinike imininingwane leminyenti.

- Kushiywa umugca emkhatsini wetimphendvulo
- Kuvalelisa nako kutfobekile
- Siyaye sibhale sitsi: Ngimi lotitfobako.
- Kuyasayinwa ngaphambi kwekubhala ligama lakho.

Tibonelo nemininingwane yetincwadzi Temtsetfo.

Incwadzisikhalo

- Emakheli mabili
- Nika sihloko salokhala ngako
- Beka sikhalo sivakale
- Nika imininingwane lebalulekile
- Yetfula ngemoya lopholile, ungatsetsi
- Ungabeki muntfu licala
- Condza ngco esikhaweni sakho
- Nika nelikhambi
Sivaleliso sihlelekile(ngimi lotitfobako)
- Sayina
- Bhala ligama nesibongo sakho

Incwadzi lecela umsebenti

- inemakheli lamabili
- Bhala sibingelelo
- Bala sihloko
- shano kutsi ubone bakhangise kuphi
- Nika lizinga lemfundvo nemnyaka lowaphotfula ngawo
- Nika Iwatinchanti lwemsebenti
- Sebentisa lulwimi lolucocekile

Incwadzi leya kumhleli weliphephandzaba

- Inemakheli lamabili
- Sibingelelo

- singeniso umtimba nesipheto
- Ayikhombise kucabanga lokututfukile ngesihloko
- ayicace kutsi iyagceka nobe iyancoma
- Ayingatsatsi luhlangotsi
- Ayibeke emaciniso njengoba anjalo.

Sibonelo sencwadzisikhalo

Ngomane Senior Secondaru
 P.O. Box 23
 WhiteRiver
 1240
 14 Mabasa 2011

Mphatsisikolo
 Luvivane Senior Secondary
 Private Bag 4
 Nelspruit 1200

Mnumzane/Nkhosikati/Nkhosatane

Sikhalo ngebafundzi labeba tikhwama tebantfwabetfu

Ngicela nekhute labafana lasebacedze tikhwama tebantfwana betfu lapho esikolweni eLuvivane.

Lesikolo sineludvumo lapha emmangweni. Sitfumela bantfwana betfu khona ngoba siyati kutsi likusasa labo liyakhanya. Lokutsanza kusetfusa kutsi kulamalanga bantfwana betfu kuwo onkhe emabanga bakhala ngekwebelwa tikhwama nemabhuku. Batsi kwebiwa kakhulu ngalesitsatfu ngoba bacale babutsane ndzawonye endzaweni yekuhlangana kute batfole timemetelo teliviki kubothishela. Kulapho ke lemigulukudu itfola litfuba lekungena emaklasini abo yebe letikhwama.

Lokubuhlungu kutsi abatsatsi letikhwama kuphela baphindze batsatse nalamabhuku. Loko akusakhinyabeti umfundzi kuphela natsi kuyasitsinta sibatali ngoba ekupheleni kwemnyaka kumele siwabhadale lamabhuku. Sitawubhadala kube bantfwana betfu bangahle bangaphumeleli ngoba abanamabhuku ebiwe? Ngiyawati emagama alabafana. Ngeke ngiwadzalule lapha kulencwadzi. Ngike ngababona betama kutsengisela bantfwana besikolo lesingumakhelwane letikhwama. Bebagcoke inyufomu yalapho eLuvivane. Ngalesikhatsi ngibabona bengitsi benta ibhizinisi, bengingati kutsi babhizinisa ngemandla etfu tsine batali bebantfwana baseLuvivane.

Siyacela Mphatsisikolo nabothishela niselekelele kulenkinga lesibukene nayo.

Ngiyabonga

R.T.Z Mshika
 Ligama lemphatsi

Incwadzi leya kumhleli weliphephandzaba

Incwadzi leya kumhleli weliphephandzaba isibonelo sencwadzi yemtsetfo.

Lencwadzi ise bentisa lulwimi lolucocekile. Lencwadzi ibhalwa lilunga lemmango libeke umbono walo ngendzaba letsite letsinta ummango. Umbhali uyaye afune kuvakalisa luvo lwakhe afuna netetsamelilwati, tivumelane naye kulombono wakhe.

Lencwadzi inemakheli lamabili.

- Sibingeleo sitsi Mnumzane/Nkhosikati.
- Awunhlanhatsi, ucondza endzabeni.
- Singeniso sakho sibeka umbono wakho ngaloludzaba lobhala ngalo.
- Umtimba wakhiwe ngetindzima letimfishane letinemibono lesekelwe.
- Sebentisa emaciniso kusekela imibono yakho.
- Imibuto lengadzingi mphendvulo, nekuphindzaphindza kuyasita

P.O. BOX 119
Kanyamazane
1214
25 Inkhwenkhweti 2013

Mhleli weliphephandzaba

Liphephandzaba Tindzaba Temaswati:

P.O Box 213

Kanyamazane

1214

Mnumzane / Nkhosikati / Nkhosatane

Kunatsa kwebantfwana besikolo

Ngililunga lemmango walapha kaGweje, ngitsanza kuvakalisa kukhatsateka kwami ngelusha lwakitsi kuleliphephandzaba lelifundvwa sive sonkhana Tindzaba Tetfu. Angivukeli kaMlumbi, ngiyatisebenta. Ngako sikhatsi lesinyenti ngisicitsa lapha esipaza sami. Lengikubona kwentiwa bantfwana betfu labafundza sikolo kungenta ngitibile kutsi kantsi sikolo sekwaba yindzawo lenjani. Sekungemahlandla lamanyenti ngibona bafundzi banatsa tjwala bagcoke iyunifomu yesikolo ngesikhatsi sesikolo. Loku akuveti sitfombe lesihle ngatsi batali baseGweje nabothishela baseSicakile.

Ngitsi nangitsi ngiyabakhulumisa bangiphendvule kungatsi ngiyintsanga yabo, bangitjela kutsi bengingekho ebusheni babo. Lokubuhlungu kutsi linyenti libukeka lisemabangeni laphasi, kepha sekuyimihuca nje, kuwisa linye libhodlela kuvuke lelinye. Uma sekangene kahle lamponjwane emtsanjeni bese bayahlabela babangele bantu umsindvo. Bantfwana ngumliba loya embili, kepha uma kubuna wona ubuniswa tjwala, sive asinawuba nayo inchubekela phambili. Asibambaneni siphume nelikhambi.

Ngimi Lotifobako
SS. Mzileni.

Umsebenti

Bhala ngalesihloko lesilandzelako ngemagama langema-80–120.

Umngumsebenti wasepulazini. Bhala incwadzi leya ephephandzabenilangakini ukhonone ngesimo lesingesihle lenisebenta ngahasi kwaso.

Incwadzimbiko - immemorandumu

- Immemorandumu isetjentiswa ngemalunga etikhungweni temsebenti
- Iyindlela labachumana ngayo uma kunembiko lophutfumako
- Kuvame kuba nelifomu lebalisayinako kutsi sebawubonile lomlayeto nobe kwentiwe emakhophi kute lowo nalowo abe nayo.

Sibonelo:

Asakhane Sugar Mill

Iya: Kuwo onkhe emalunga

Ibuya ku: Mcondzisi weNkampani

Lusuku: 11 Inyoni 2011

Inombolo yememorandumu: 23/2012

Sihloko: Ingoti levelele basebenti

Umlayeto

Sisandza kutfola umlayeto lotse kwenteke inhlekelele yengoti ngalesikhatsi Ibhasi lelayishe basebenti bakulen kampani ilahlekelwa ngemabhiliiki nemshayeli ehluleka kuyilawula. Ibese Ingona eweni. Kutsiwa banyenti labalimele. I- ambulensi seyibitiwe seyivele iphutfumise labanye esibhedlela.

Naku lesitakwenta kusukela nyalo.

- Sitawuvala umshini wekugaya shukela ungasebenti lamuhla ngoba kulimele labanyenti labakulelitiko lekusetjentiswa kwemshini.
- Sitawuya lapho kwenteke khona ingoti.
- Labanye batawatisa laba labasemasimini ngalengoti.
- Sitawubese setama kutsintsa imindeniyalabo labalimele kulengoti

Z.B Ncele Umphatsi.

Umlandvomphilo

Umlandvomphilo ngumbhalo wekwatisa bantfu ngebunguwe. Udzinge ka etindzaweni lapho ucele umsebenti khona nobe lawucelakhona imali yekufundza. Uba nemininingwane yonkhe ngemphilo yakho: lecondzene nawe, imfundvo yakho, Tifundvo lophumelele kuto nekutsiuphumelele njani, Iwati Iwemsebenti, Emakhono, nalotsanza kucitsa ngako situnge, bofakazi labakwatiko.

Akesibuke nasisibonelo lesilandzelako:

Umlandvomphilo waThandi Maseko

1. Imininingwanemnikati

Sibongo	:	Myeni
Libito	:	Gugulethu
Bulili	:	Lomsikati
Kushada	:	Angikashadi
Tekushayela	:	Khodi 10
Inkholo	:	NgingumKhrestu
Inombolo Yamatisi	:	1107084161175
Likheli Lasekhaya	:	17 Tingwenya Road Sonheuwel 1201
Likheli Lasekhaya	:	Box 1 Nelspruit 1200
Lucingo Lwasekhaya	:	013-7941122
Makhalekhikhini	:	0762394511
Simo Sempilo	:	Ngiphilile

2. Temfundvo

Imfundvo Lephasi	:	Khulakahle Primary
Imfundvo Lephakeme	:	Tikhetselle Senior Secondary
Tifundvo Letiphasiwe	:	Siswati lulwimi Lwasekhaya, Singisi lulwimi Iwekucala Iwekwengeta, Isayensi, Tibalo, Temphilo nekuhleleka kwayo
Inyuvesi	:	BA UDW
Tifundvo	:	Kuhumusha kusuka eSiswatini uye eSingisini.

3. Lwatinchanti Iwemsebenti

Litiko LeTemasiko, Temidlalo Nekukhibika: 1984 -1990

4. Tekucitsa situnge

Kufundza emanoveli eSiswati neSingisi
Kubhala tindzatjana

5 Bofakazi

1. Mnz. DZ Malaza Umcondzisi weLitiko (Meninjeli Weliposi LaseNasipoti)
Lucingo: 0724233331
Nkhskt. TS Bhembe (Umfundisi)
Lucingo: 0832222200

Umlandvomufi

Tidzingo temlandvomufi nguleti letilandzelako:

- kuvetwa ligama laloshonile
- lusuku lwekutalwa nelekushona kwakhe
- indzawo latalelwe kuyo
- imbangela yekushona kwakhe
- budze besikhatsi lasigulile
- Imphumelelo nobe tintfo letinhle lahlabene ngato
- lizinga lemfundvo
- bekasebenta kuphi
- kutibandzakanya kwakhe emmangweni
- ushiya bobani emhlabeni.
- umlayeto wekudvudvuta umndeni

Ake sibuke nasi sibonelo semlandvomufi:

Umlandvomufi waZenZile Doris Mhlanga



Umufi ZenZile Doris Mhlanga, loyindvodzakati yekucala yaLoliwe naLomasela Mhlanga. Watalwa mhla tingemashumi lamabili nakunye enyangeni yeNgongoni ngemnyaka wanga- 1961, eMahushu esifundzeni saseMpumalanga. Wacala kufundza esikolweni semabanga laphasi eMahushu. Imfundvo yemabanga laPhakeme wayifola emajombe lapho atfola sitifiketi samatikuletjeni ngemnyaka wa-1981. Bekangumfundzi lotimisela kakhulu emsebentini wakhe wesikolwa. Nobe angesiye lobehamba embili eklasini kepha bekaba kulabo labalishumi labasembili.

Wachubeka nemfundvo lephakeme eNyuvesi yaseWitwatersrand lapho afundzela khona tetimali. Waphotfula ticu takhe kuteTimali. Wacala kusebenta ebhange e FNB anaka tidzingo temakhasimende. Bekatsanza kakhulu kudlala libhola lemphebeto ngesikhatsi sekucitsa situnge. Ube neligalelo lelikhulu emmangweni ngoba esikolweni semabanga laphakeme sasemmangweni wakubo bekakhetsa babili bantswana labahluphekako ababhadalele bate bacedze kufundza matikuletjeni. Usishiye emhlabeni ngengoti yemoto mhla tilishumi enyangeni yeNgongoni. Ushiya emhlabeni emadvodzakati akhe lamabili langemawele BoTandzile naTiyandza.

Sengatsi umoya wakhe ungalala ngekuthula. Mhlanga Khabako.

Inkhulumiswano

- Yakha iuhlaka Iwenkhulumiswano ngembikwekubhala
- Yetfula tikhulumi nendzawo letikuyo nekutsi tikhulumo ngani.
- Veta inkhulumiswano emkhatsini webantu lababili nobe labangetulu
- Cala ngeligama lesikhulumi kalandzele ikholoni bese ubhala inkhulumo yaso.
- Bhala inkhulumiswano njengoba yenteka, ibuya emicabangweni yetikhulumi, ungabiki
- Sebentisa umugca lomusha kukhomba kutsi sengulesinye sikhulumi
- Khombisa tikhulumi nobe tetsamelilwati kutsi kukhulunywa njani nobe umnyakato lokubakaki ngembikwekukhulumo
- Sebentisa kahle tiphumuti kuveta imiva yetikhulumi. sibabato, umbuti, nemacashata lakhomba kutsi inkhulumo ayikapheleli.

Sibonelo:

Make waHluphile utfole incwadzi lets iakaphutfume esikolweni ngoba Hluphile ulwe walimata umfundzi, ngaloko ke kumele abhadale tindleko tasesibhedlela. Nakatfola lencwadzi utfukutsele wagana lunwabu.

Lamotsa: (amemeta ngekucasuka) Hluphile, YeHluphile kantsi uhleli ngetindlebe awuva kutsi ngiyakubita.

Hluphile: Ma

LaMotsa: Ake uphutfume lapho wena!

Hluphile: (Acabanga) Ngabe seyini make wangimemeta ngalendlela, kukhona lokushaya emanti, ngabe sewutjelwe ngubani ke, futsi bantfu nemanga abo....

LaMotsa: Ake usho esikolweni ngakutfumela kutsi uyoba nguMike Tyson wakhona, nhhe? Phendvula, mine angikuyisanga ekhozini yekulwa, ngakutfumela kutsi uyewufundza!

Hluphile: Angivisi make kutsi ukhuluma ngani?

LaMotsa: (Amkhombisa incwadzi) Fundza lapha utawubona kutsi ngikhuluma ngani!

Hluphile: (Akhamise umlomo lapho abona kutsi incwadzi ikhuluma ngekulwa kwakhe naCalsile.)

LaMotsa: Bewumshayelani lomntfwanebantfu ngoba nyalo sewuvuvuke umlomo.

Hluphile: Nguye lolongicalile, vele nje lentfombatana leya isibheva.

LaMotsa: Manje umtsetfo wesikolwa utsi phindzisela wena uma bakushaya, akusiwe lona bewungifundzela lomtsetfo wekutiphatsa kwebafundzi ngembikwekutsi ngiwasayne.

Hluphile: Awusho njalo, batsi sibikele thishela ngiyacolisa Mvulane ngeke ngiphindze.

LaMotsa: Hhayi cha, uganga utsembe kucolisa, buka nyalo ngingene etindlekwani, sekufuna ngicele emsebentini, kute ngiyewulalela letinkinga takho. Waphindza utatibonela.

Hluphile: (Akhombisa kutisola) ngiyabonga make wami angeke ngiphindze futsi ngicela ungamtjeli babe.

LaMotsa: Cha uyhlo ngitawumtjela nje nakabuya emsebentini phela unguimtfwana wetfu sobabili. (Nakabuya Dlamini LaMotsa wavele wamtjela).

Inkhulumo

Inkhumo nguloko sikhulumi lesikukhulumako labanye balalele. Nobe-ke inkhulumo ihlala ilungiselelwe, kukhona timo letidzinga ukhulume ungakatilungiseleli.

Tinkhulumo singatetfula emadzilini, emishadweni, emicimbini, emingcwabeni noma emicimbini lapho kuklonyelisa bantfu khona.

Inkhulumo lenhle nguleyo lengabetelisi bantfu labalalele. Kute inkhulumo ihehe, kufanele ibe ngetintfo letisematseni, tintfo letitsintsasikhatsi lesiphila kuso. Kuyenteka ngalesinye sikhatsi sikhulumi sifake tintfo letingakadzingeki, kepha utfole kutsi labalalele bayatidzinga. Lolo lwati kufanelelungabi lunyenti kakhulu. Kufuna lutsintseke nje ngaleylo ndlela hhayi kutsi ungate uphume esihlokweni. Inkhulumo kufanele ibahlekise kancane labo labalalele baphindze bachubeke nekulalela lenkhulumo. Akukafaneli-ke kutsi ibe yindze kakhulu. Kufanele itsintse tintfole tiphat selene nemphilo yetfu lamuhla njengengculazi lesitsinta sonkhe. Inkhulumo lehlelekile ilungiselelwa kusenesikhatsi, kwentiwe lucwaningo loludzingekile. Yetfulwa ngaphandle kwekusebentisa tinsita letitibonwa. Lulwimi lunotsile, kusentjetiswe tinongo tenkhulumo nelulwimi lolungenamaphutsa.

Tikhulumi tiyaye ticaphune emagama latsite latsetfwe kuletinye tinkhulumo tebantfu labadvumile noma tinkhulumo letatiwa mhlabu wonkhe. Kute inkhulumo ibe ngulekahle, levakala kahle, sikhulumi siyaye sisibentise imifanekisomcondvo nemagama lagcizelelako levakalisa kahle inkhulumo yaso. Lokukhulunywako kumele kubalungele labo labalalele, akube yintfo lebatsintsako labafuna kuva ngayo. Ngeke sikhulumi sikhulume nebantu labadzala njengoba singakhuluma nebantfwana.

Inkhulumo lehlelekile inaletinhoso letilandzelako:

- Kwatisa/kufundzisa
- Kuncenga
- Kucitsa situnge
- Kujabulisa tibukeli.
- Kukhutsata
- Kwecwayisa
- Luhlaka
- Sakhiwo senkhulumo

Sihloko

Inkhulumo lenhle nguleyo lapho sikhulumi sinika sihloko lesibumbanako naloku lamenyelwe kona.

Kubingeleta

Sikhulumi sibingeleta labo labakhona ngetikhundla tabo nobe ngetigaba tabo.

Singeniso

Sikhulumi setfula loku lesitawukhuluma ngako. Umlaleli uyati kutsi sikhulumi sitawukhuluma ngani ngekulalela setfulo senkhulumo.

Umtimba

Sekhulumo setfula umlayeto. Sikhulumi siletsa imibono lehambelana nesihloko kanye nesincumo lasitsetse yena mayelana nalesihloko. Nguleyo naleyo ndzima inemcondvo lobalulekile, imicondvo ayikahlangahlangani.

Siphetfo

Siphetfo lesifishane ngulesinemisho lemincane lemifishane. Tincomo letitsite tingetfulwa kulesiphetfo bese sikhulumi sigcina ngekubonga loyo lohola lilanga lemhangano.

Inkhulumo lengakahleleki

Lenkhulumo lena ungayetfula ngaphandle kwekutilungiselela. Ayilandzeli timiso letibekiwe nobe luhlaka. Ngalesinye sikhatsi sikhulumi singate sikhombise ngetinsita letitsite loku lesikhulumangako. Lenkhulumo incika kakhulu elwatini lesinalo sikhulumi nobelucwaningoo lesilwentile sikhulumi. Akukadzingeki kutsi sikhulumisibe nesihloko lesitawukhuluma ngaso. Yinkhulumo lengakalungiselelwya ngako.

Umsebenti

Kutawuba nelusuku lwekunika imiklomelo kubo bonkhe bafundzi labatfole imphumelelo ngemaphesenti langemashumi lasikhombisa kuya etulu kuleso naleso sifundvo, wena njengemfundzi losebenta ngekutimisela, ucelwe kutsi ukhulumele liklasi kulomcimbi.

Imibiko

Umbiko nguleminingwane loyefulako ngalokutfolile nawenta lucwaningo lolutsite. Umbiko unga faka leminye imininingwane ngengcikitsinobe sihloko locwaninge ngaso. Esikhatsini lesinyenti emisebentini yetfusiyacelwa kutsi ibhale imibiko ngenchubekelaphambili yemsebenti nobeke letinye nje tigameko letentekile.

Tinhlobo temibiko

1 Umbiko lohlelekile

Lombiko lona ulandzela timiso letitsite letibekiwe futsi kufanele ubike usebentisa lokukhulunywa ngaye (*Third Person*).

2. Umbiko lokhululekile

Lombiko lona awulandzeli timiso letibekiwe. Lobikako angabhalaasebentisa lokhulumako (*First Person*).

Luhlaka Iwembiko lococekile

- Sihloko
- Singeniso
- Indlela lesentjetiswe nakwentiwa lucwaningo
- Lokutfolakele
- Siphetto
- Tincomo
- Lusayino Iwalobikako
- Sigaba nobe sikhundla salona lobhale lombiko
- Lusuku
- Lokudzingekile nawubhala umbiko lococekile
- Awufinyeteke ucace
- Awucondze ngco kulokubikwako, ungatsemeleti
- Lulwimi alube ngulolwemukelekile lolunenamaphutsa
- Awulandzele luhlaka Iwembiko lolwemukelekile.

1. Ake sibuke nasi sibonelo sembiko lohlelekile

Sihloko

Umbiko ngekungaphumeleli kahle kwebafundzi bakamatikuletjeni.

Setfulo/Singeniso

Kulandzela ticondziso tekwenta lucwaningo Iwembangela yekungaphumeleli kwebafundzi, lubese luyentiwa lolucwaningo.

Indlela Lesentjetisiwe

Labo labangaphumeleli bavakashelwe emakhaya abo kwentiwa inkhulumo luhlolo. Nebafundzi labangaphumeleli kulamabanga langeephansi nabo bakhulunyisiwe. Kubese kuhlolwa tinsita letikhona tekwelekelela bafundzi kutsi baphumelele Timo tasemakhaya lapho bahlala khona tihlisisiwe.

Lokutfolakele

Labo belibanga lamatikuletjeni kutfolakele naku lokulandzelako.

1. Simo semnotfo sasekhaya sime kabi kakhulu.
2. Kugulelwa batali/kushonelwa batali.

3. Kweswelakala kwetincwadzi esikolweni.
4. Kubete Sineke kwabothishela.
5. Kungefiki ngesikhatsi ngendzaba yekweswelakala kwetigitjelwa.

Siphetfo

Bafundzi abaphumeleli ngendzaba yetizatfu letingetulu kwemandla abo.

Tincomo

Umntfwana lowemukelwa njengemfundzi wakulesikole kufanele kutsi yatiwe imvelaphi yakhe kute atewusitakala, netinkinga takhe tibukisiswe kahle kute asitakale kusenesikhatsi. Tincwadzi kufanele titfolakale esikolweni hhayi kutsi bafundzi batitsengele.

Lusayino
T.G Malambe
B.Z Mohlala
Umbiko Longakahleleki

Timphawu tembiko longakahleleki

Kute lucwaningo lolwentiwako. Umbiko weyame ekuticabangeleni nobe kucagela. _
Lobikako usebentisa lokhulumako “mine, tsine” njll.
Ake sifundze nasi sibonelo sembiko longahleleki

Wota Nendlebe Sikolo Lesiphakeme Kungaphumeleli kwebafundzi beLibanga 11
Ngetamile kuhlolisia lendzaba yekungaphumeleli kahle kwebafundzi belibanga 10.
Lendzaba ivisa baphatsi buhlungu lobukhulu.
Lokutfolakele
Kuvakele ngandlebenye kutsi labafundzi labangaphumeleli eluhlolweni lelibanga 10,
bayeswela. Labanye batintsandzane, kantsi labanye beswela tigitjelwa.

Tincomo

Kufanele siyifakele tibuko lendzaba yalabantwana njengoba bangumliba loya embili.
Umntfwana ngamunye kumele atiwe kutsi uhlala nabani, kuphi futsi umnyaka
usasuka, kute batewukhona kusitakala. Singakhona kubhalela betenhlalakahle kutsi
babasite. Kantsi natsi sibothishela singabasita ngoba betfu natsi labantwana.
Lusayino

T.G Malambe
B. Z Mohlala

I-ajenda nemaminithi

I-ajenda ikhomba lusuku lwemhlangano indzawo, sikhatsi neluhlalwetihloko letitawudzingidwa emhlanganweni. Iba simemo sebantfu labafanele bete emhlanganweni nendzima labatawuyidlala kulomhlanano.

Emaminithi ngemarekhodi emhlangano lacocekile langatsemeleti, lacacile.

Inhoso yemaminiti kwenta siciniseko sekutsi lokwenteka emhlanganweni kubhalwe njengoba kunjalo yini. Kuyatiwa kutsi bobani labebakhona, labacolisa, labebangekho, kwatsiwani, kwancunyuwa kutsini, lokwatsiwa kutawentwa bobani.

Kubalulekile kutsi kushiwo kutsi umhlangano wabobani.

Sibonelo se-ajenda nemaminithi

Kumenywa bafundzi belibanga lelishumi 10D

Indzawo : Eklasini KA 10D
Lusuku : 15 Lweti 2012
Sikhatsi : 10h00

Luhlelo

1. Kuvulwa.
2. Emavi asihlalo
3. Emalunga lakhona nalangekho.
4. Kufundvwa kwemaminithi
5. Lekuvuka emaminithini
6. Umsebenti welusuku
 - a. Bafundzi labangeti esikolweni onkhe malanga
 - b. Kungamakwa kwemsebenti webafundzi
 - c. Bafundzi labangahloniphi bothishela
 - d. Emasu ekutsi siphumelele sonkhe eluhlolweni
 - e. Luhambo lwetfu loluya kaSikhukhuza
7. Lusuku lwemhlangano lotako
8. Kuvala

Amamithi omhlangano

Sibonelo:

Emaminithi emhlangano webafundzi belibanga 11 base Museni Secondary School kulungiselela umcimbi wekuphela kwemnyaka

1. Kuvulwa kwemhlangano

Wavulwa ngusihlalo ngemthandazo.

2. Kwemukelwa

Sihlalo, wemukela emalunga labekhona.

3. Emalunga labekhona.

Onkhe emalunga bekaphelele.

4. Kufundwa kwemaminithi

Afundwa abuye emukelwa

5. Lokwavuka emaminithini:

Ngabe litseni libandla lelengamele sikolo I SGB ngekulungiswa kweluphahla loluphephukile nemafasitelo lephukile.

Latsi kuleliviki leletako ngalesihlanu

6. Umsebenti welusuku

Bafundzi labaneti onkhe malanga esikolweni

Kwancunywa kutsi Kutawubitwa batali kuhulunywe nabo kutsi batise sikolo uma umfundzi angeke ete esikolweni banike tizatfu letivakalako.

Kungamakwa kwemsebenti wasekhaya

Savumelana Sitawubikela thishela weliklasi letfu kutsi sikhatsi lesinyenti, kuletinye tifundvo umsebenti wasekhaya asimakhelwa.

Bafundzi labangahloniphi bothishela

Laba bayahlaza liklasi, nabo kwatsiwa kutawubitwa batali babo uma ngabe abantjintji emva kwekuhulunyiswa nguthishela weliklasi letfu.

Emasu ekutsi siphumelele sonkhe ekupheleni kwemnyaka

Kwakha emacembu ekufundza uma sikolo sesiphumile njengebafundzi belibanga 12

- Kwacelwa sikolo kutsi sinake kuphepha kkwetfu.
- Satsi sitawusebentisa emaphapha eluhlolo lwelwendlulile netimphendvulo
- Luhambo loluya kaSikhukhuza
- Onkhe emalunga asabhadele.
- Lusuku kumhla titine enyangeni yeNyoni

7 Lusuku lwemhlangano lotako

Mhla titimbili enyangeni yeMphala 2012, nakunetingucuko sitanatisa.

8. Kuvala

Umhlangano wavalwa ngemthantazo lowabekwa ngumholi weliklasi.

Sihlatiywa (irivyu)

Setfulwa nangabe ufundza libhuku, ubukela lifilimu, ubukela umdlalo webhola, ulalela umdlalo wemoya njll. Sihlatiya sihlole ngenhloso yekwengeta lwati, imibono nobe sihlabe lokutsite nobe sikhipe lokutsite kute lomsebenti wemukeleke.

Kulesinye sikhatsi sihlatiya kute sihehe labanye kutsi bafune kufundza lelibhuku, nobe kubukela lifilimu njll, kuya ngekutsi yini lena lehlatiywako.

Tidzingo

- Uveta tiphakamiso takhe ngemsebenti lodywetjiwe, lifilimu, libhuku nobe umdlalo.
- Kunikwa imibono netincumo ngemsebenti lowetfuliwe
- Kuhlatiya kumele kucondze ngco
- Kunikwa lemininingwane lelandzelako: ligama lembhali, umhleli, sihloko semmcwadzi/umsebenti, ligama lemshicileli, Inkampani lekhicitako uma kudzingeka
- Lusuku lelishicilelwwe ngalo
- Sifinyeto sesakhiwo sendzaba nobe lifilimu
- Ingcikitsi

Sibonelo sesihlatiywa

Bengibukela lifilimu lelashicilelwwe ngemnyaka wa 2006 linesihloko lesitsi *Akeela and the BEE*. Licondzisa nguDoug Atchinson. Kulelifilimu kunentfombatana ligama layo nguAkeela. Lentfombatana beyinelikhono lelisetulu lelupelomagama. Belipela cishe onkhe emagama kahle uma thishela abanika umsebenti wesipelingi. Kutse ngalelinye lilanga thishelanhloko wacela kutsi angenele umncintiswano lobitwa ngekutsi Spelling BEE. Akeela akatange asheshe akwemukele loko ngoba esaba kutsi bangani bakhe batawuhlekisa ngaye. Ugcine avuma kusingenela, kepha inkinga lenkhulu kwaba kutsi make wakhe Tanya Anderson akatsandzi kutsi ente lomncintiswano.

Wachubeka nawo unina angati, watfola Professor Larabee kutsi amceceshe. LoProfesa bekangamceceshi ngemagama kuphela kepha bekamnika indlela yekuphumelela. Watsi lokusenta sesabe ngulokutsi sinawo emandla lamakhulu ekuphumelela, asesabi kwehluleka, sitesaba tsine. Akhile bekachudzelana naboDylan najavier.

Batali baDylan bebangafuni abe nelitfuba lekudlala kepha labebakufuna bekukutsi aphumelele kulomncintiswano kukuhle nobe kukubi. Bo Akeela bayo edzinlini lemngani wakhe Javier lekugubha lusuku lwekutalwa, Dylan yena uphisheke ngekupela. Lelifilimu leli libaluleke kakhulu kitsi tsine bafundzi. Sifundza kupela kahle emagama, siphindze sifundze kubeketelela timo lesihlangana nato. Siphindze sifundze kutsi imphumelelo yakho ayibi yakho wedwya kepha iletsha intfokoto kulabo lohlala nabo emmangweni. Umbhali wente kahle kutsi baphumelele ngekulingana boDylan na Akeela kukhomba kutsi labanye bayaphumelela ngekutsi bagcile kuleyontfo labayentako, kanjalo uyaphumelela nobe utinika sikhatsi sekuphumula wente letinye tintfo letiphumuta ingcondvo.

Umsebenti 1

Ngemagama langabi ngaphasi kwalange 80 kepha angabi ngetulu kwala-120 bhala sihlatiywa selifilimu lolibukele kulamalanga.

Sihlelwa i-edithoriyali

Sihlelwa siveta imibono letsite lebhaliwe kungaba sephephandzabeni nobe ephephabhukwini. Umbhali usibhala kute avete imibono yakhe.

Sihlelwa sinanati tidzingo letilandzelako:

- Sikhulumu ngendzaba ledvumile
- sinika imibono netincomo
- siheha tetsamelilwati kutsi tivumelane nembono wemhleli
- Kuba nesihloko nelusuku
- Kuba nesingeniso, sipheto nobe umtimba

Sibonelo

Bontsanga banemtselela longanani ekusebentiseni tidzakamiva?

Thabile Nkosi

Kulamalanga bafundzi basheshe bacale kunatsa kunalokwejwayelekile. Bavame kuyenga batali babo batsi baya kuyewufundza ekhaya kabomngani. Nabefika lapho kuba nelidzili letjwala, kuba ngumchudzelwane kutsi ngubani lokhona kunatsa tjwala lobunyenti ngesikhatsi lesifishane. Nawubabuta kutsi yini banatse tjwala babancane kangaka bavele batsi banyenti bantfu labasheshe bacale kunatsa emhlabeni, kantsi naletikhangiso tetjwala tinyenti kakhulu ngiko nako baheheka.

Lokulandzela bontsanga wente info lembi akusiyo indlela lemukelekile yekuphila. Kuphocelelwa bontsanga kutsi wente lokutsite kwenteka lapho bontsanga yakho bakuphocelela kutsi ucabange nobe utiphatse ngendlela letsite lefunwa ngibo. Lokuphocelelwa kungaletska tingucuko letinyenti letimbi emphilweni yemuntfu. Phela bontsanga ubatfola esikolweni, uphindze ube nabo emmangweni.

Umfundzi losebangeni lelishumi usengakabhadli kahle ehloko kutsi angasheshe akubone kutsi bontsanga bayamdukisa, yena ubona enta info letawujabulisa bangani bakhe kute naye emukeleke kulelicembu. Banyenti bantfwana labetamako kumelana nekuphocelelwe kepha babitwe ngemagama lakhomba kutsi batehluleki, futsi balibebe abakhoni kwenta tintfo letinsha.

Yintfo lembi kutsi bafundzi bachubeke banatse tjwala nobe bayati imitselela yekunatsa tjwala. Kuncono umfundzi akhetse bangani labaphila imphilo lefana neyakhe lehambisana nemagugu lanawo ngoba kutawuba lula kophilisana nabo. Bona laba labaphila imphilo lencomekako bangasita kutsi babe tibonelo kulaba lesebanikele ngemphilo yabo etjwaleni. Nebatali kumele beluleke bantfwana babo bakhone kumelana netimo tekuphocelelwa bontsanga.

Umsebenti

Kunendzaba lesematseni ngekutiphatsa kwelusha. Bhala sihlelwa lotasitfumela ephephandzabeni langakini. Sihlelwa akho sibe ngemagama langabi ngaphasi kwe-80 kepha angabi ngetulu kwe-120.

6 Athikheli yeliphephandzaba

I-athikhiei yeliphephabuku nobe liphephandzaba iyindlela yekuletsa lwati, ingucuko, imininingwane letsite mayelana naloko umhleli lafuna kukwendlulisa nobe lafuna kukukhangisa. Umhleli angasebentisa ifonti lehlukahlukene, imibala lehlukahlukene futsi legcamile, imidvwebo lehlukene kugcugcutela, kutsengisa umcondo lokutsite. I-athekhili yehlukaniswe katsatfu, singeniso, umtimba nesiphetfo.

Lulwimi lolusetjentiswako lufanele lubete emaphutsa elulwini, futsi luvakale mbamba

Bayahlupheka bantfwana bemantfombatana labahamba kulendlela leyendlula ehlatsini

Sive Siyandza Ntfulini

Bantfwana labanyenti labafundza esikolweni lesiphakeme sasePhumlile labahamba ngetinyawo basengcupheni yekutfunjwa nekdlwengulwa. Lendlela inesihosha lesinelihlati lelisabekako. Ngisho umdzala uva kuphakama tinwele nawengca kulendzawo. Kusukela kwatfunjwa kwabulawa intfombatana kuleliviki leliphelile, bantfwana sebayesaba kuya esikolweni. Labanyenti sebajika endleleni babuyele emakhaya ngoba abati kutsi kutakwentekani.

Ngalesihlanu lowengile lenye intfombatana beyilandzelwa yindvodza lephetse silimato kuyo yona lendlela. Yatsi lapho itsi iyahlasela lendvodza kwachamuka imoto yathishelanhloko, lwase luyaphatamiseka loluhlelo lwayo. Yasindza kanjalo lentfombatana.

Tibusile, lenye Intfombatana leneminyaka lelishumi nesihlanu, Itsi"

Umsebenti

Bhala I athikheli yeliphephandzaba ngenkinga lekhungetse ummango wangakini.

mine sengifuswa nayintsetse letindizelako ngenca yaletigigaba letenteka kulendlela, angikate ngativa ngesaba kangaka emphilweni yami. Angisakhoni nekufundza nangicabanga kutsi kusefanele ngibambe lecondze ekhaya.

" Impela labatfumbi nalabagagadleli bacondzene ngco nebafundzi basePhumlile. Singativela njani siphephile nangabe sekungemahlandla lamabili lalandzelanako ngesikhashana lesifisha sihlaselwa.

Umngani waTibusile longusobahle utsi yena batali bakhe bammikisa kulesinye sikolo kulomnyaka lotako. " Nobe ngitsandza ePhumlile, uma kuphuma kwami kusho kuphepha kwami, ngikulungele kuya kulesinye sikolo nobe bekungasiso sifiso sami."

Ikholomu yeliphephandzaba

Ikholomu yeliphephandzaba icishe ifane nje ne-athikili yeliphembandzaba.
Lokwehlukile kutsi yona ibhalwa ngumuntfu lonelwati lolujulile ngaloko labhala
ngako, ayibhalwa nje nobe ngubani.

Dokotela angabhala ngeTemphilo
Umshayeli wetindiza angabhala ngekushayela indiza.
Umfundisi angabhala ngetenkholo
Umpheki angabhala ngetekupheka

Sibonelo

Kunakekela ematinyo takho

Ikholomu ya dokotela Sivesini Mdluli

Tsine bodokotela bematinyo sitsi
indzima lenkhulu ekunakekeleni
ematinyo idlalwa batali. Batali kumele
batjele bantfwana kutsi kumele bahlale
njalo bacubha ematinyo abo
lokungenani cabili ngelilanga. Loku
kuvikela kungcola lokubese kwakhela
lapha ematinyweni bese kubanga
kubola kwematinyo. Kucubha
ematinyo nekuhipha kungcola
ngemtiya wekukukhipha nekuhlolwa
ngudokotela wematinyo kanye
ngemnyaka kungavikela kubola
kwematinyo. Nawungavani ne drill
yadokotela kuncono ugweme kudla
tintfo letisheshe tibolise ematinyo,
ucubhe lokungenani cabili ngelusuku
uphindze uyewuhlolwa ngudokotela
wematinyo.

Uma ucubha ciniseka kutsi kungcola
lokubonakalako uyakususa
ematinyweni, ikakhulukati uma ucedza
kudla. Kumele usebentise
sichubhamatinyo lesineflouride. I
flouride iyancomeka kakhulu
ekususeni lokungcola nekuvikela
kubola kwematinyo. Kuchuba kwenta
tinsini tihlale tiphilile.

Munye kulabalishumi uvame kutsi abe
netartar ematinyweni. I tartar kungcola

lokucine kakhulu lokuwalimata kakhulu
ematinyo kantsi futsi akusuki kalula.
Kuvikela, singavikela ngekusebentisa
ticubhamatinyo letimelana nayo.

Uma unematinyo lasheshe aphantime
uma ahlangana nekushisa nobe
kubandza, tfola sicubhamatinyo
lesenta ematinyo amelane nekushisa
nobe kubandza. Kantsi kubalulekile
kutsi utfole luvo Iwadokotela ngoba
kuyenteka kulesinye sikhatsi
kuphatime ngenca yenkinga lenkhulu
lekhona, lengabonwa ngudokotela
wematinyo.

Umsebenti

Ephephandzabeni unekholomu yakho yeTemasiko. Bhala ikholumu yakho yaleliviki ngekubaluleka kwemasiko esiveni seMaswati.


Ibrosha

Ibrosha libhukwana lelisinika lwati mayelana nemkhicito, imisebenti letsite nobe tindzawo letitsiteletinika tinsita nobe tekungcebeleka

- Tidzingo tebrosha
- Sifundza lapho lendzawo itfolakala khona
- Lidolobha lenitfolakala kulo
- Umkhicito/Indzawo
- Buhle bemkhicito nobe Indzawo
- Emazinga ekushisa
- Tekuchumana.

Sibonelo sebrosha:

Sikolo lesikhulu Kuyasa



Ligama lesikolo: Kuyasa High School

Sicubulo: Silwela imphumelelo yayo wonkhe umntfwana.

Esifundzeni saseMpumalanga

Lidolobha: Nelspruit

Tinombolo tekuchumana: 013 750 3321

Likheli P.O.Box 1 Nelpruit 1240

I-imeyli: kuyasahighschol@education.gov.za

Sidvume ngemfundvo lesezingeni lelisetulu

- Wonkhe umfundzi uyanakekeleka kaMatikuletjeni kuphumelela wonkhe umntfwana yonkhe minyaka
- Sinabothishela labaceceshiwe
- Sinetinsita letenele tekufundza

Takhiwo tesikolo

- Sinetinkhundla letinkhulu letehlukene tetemidlalo emalabholatri esayensi, elulwimi, abongcondvomshini
- Sinelihholo lelikhulu lapho sihlanganelo khona ngetidzingo letehlukahlukene
- Kunengadzi yetibhidvo
- Sinendzawo yekufundzela kushayela

Kuchumana nebatali ngemiphumela yebantfwana

- Siyawatfumela emaphothifoliyo ebantfwana njalo ngethemu.
- Sifumela emakhadi emibiko yemphumelelo yemfundzi
- Siba nemhlangano webantfwana, batali, nabothishela lapho sibika khona imiphumela yayo onkhe emabanga.

Letsa umntfwana wakho evusalitsema angeke utisole!

Umsebenti

Bhala ibrosha ukhangise sikolo lofundza kuso kute uhehe bafundzi labachamuka etindzaweni letehlukahlukene.

Sahluko 4 Liphepha lesitsatfu lelisibonelo

Luhlolo Iwekuphela kwemnyaka

Sikhatsi 2 Ema-awa

Emamaki: 100

Ticondziso kulabahlolwako

Sigaba: A tindzaba


Sigaba B: Ematheksthi emibhalombiko

Ticondziso

1. Labahlolwako balinzelwe kutsi baphendvule munye umbuto esigabeni A, namibili imibuto esigabeni B.
2. Cala ngeluhlaka ngembikwekubhala indzaba esigabeni A.
3. Cala leso naleso sigaba ekhasini lelisha, udvwebele emva kwaleso naleso sigaba
4. Bhala ngebunono nangesandla lesifundzekako
5. Caphelesia lupelomagama nendlela yekwakha imisho.

Bhala indzaba ngasinye saletihloko letilandzelako ibe ngemagama langabi ngaphasi kwe-240 kepha angabi ngetulu kwe-290.


1. Bhala Indzaba legcina ngalamavi latsi "Lengakubona, ngitawukukhohlwa ngifile."
2. Bhala indzaba lenesihloko lesitsi Umsakati lengimtsandzako.
3. Utsini umbono wakho ngekutsi bantfwana labancane labafundza emabanga laphasi batsemgelwe bomakhalekhikhini?
4. Bukisia lesibonwa lesiladzelako bese ubhala indzaba (lelandzisako).



5. Bukisia lesibonwa lesilandzelako bese ubhala Indzaba (Lechazako)



6. Bukisia lesibonwa lesilandzelako bese ubhala indzaba letsatsa luhlangotsi.



Sigaba B

Khetsa kubili kuloku lokulandzelako bese ubhala ngako ngemagama langabi ngephasi kwala-100kepha angabi ngetulu kweli-120.

1. Inkulumomphendvulwano

Kulahleke imali yalomunye umfundzi eklasini lengemarandi lalikhulu nyalo basolela kuwe ngoba nawe bakutfole unemarandi lalikhulu esikhwameni sakho. Asive inkhulomo leyaba khona emkhatsini wakho nathishela nawumchazela kutsi lemali akusiyo yalona lolahlekelwe ngeyakho. [20]

2. Umlandvomufi

Kushone sihlobo sakho lobewusitsandza kakhulu. Emndenini wakini babone kutsi wena unelikhono lekubhala umlandvomufi njengoba bake bawubona emabhukwini akho esikolo. Bacele kutsi ubhale umlandvomufi walesihlobo sakho. Bhala lomlandvomufi. [20]

3. Incwadzi yemtsetfo

Utsenge titja kaPresless, bakutfumelela tona ngeliposi. Utse uyavula wakhangwa tincetu nje, konkhe lokusekhatsi kuphihlilikile, awusaboni nobe bekulipulete, nobe inkhomishi. Bhala incwadzi ukhonondze ngalesehlakalo. [20]

4. Sihlatiywa

Bewubukela lifilimu lelisandza kushicilelwa. Bantfu basengakati ngalo, wena ubona kungatsikuhlebontsanga yakho eklasini balibukele. Bhala sihlatiywa salelo filimu lotawusibeka ebhodini letatiso emtatjeni mabhuku wesikolo sakho. [20]

Sigaba sesibili: tembhalo imibhalo efundvwa eklasini lonyaka

Naku lokufundvwako kutemibhalo lonyaka

Tinkondlo

Emanovel/Temdzabu

Umdlalo

Imibuto lengaba lusito

Tinkondlo

Yini lokumele kwatiwe bafundzi ngesakhiwo sangephandle senkondlo?

Sakhiwo sangephandle sifaka ekhatsi loku lesikubona ngemehlo kulenkondlo lokungadzingi site sifundze sijule lokufaka ekhatsi,(i-phethini) tindzima, imigca, emagama, imvumelwano, luchumano, Sifanamsindvo (sifanangwaca, sifanankhamisa), sidvonsamoya, (isuzuri), sicedzelelamcondvo (i-enjambamenti), imphindza nemphindvwa.

Yini iphethini yenkondlo?

Iphethini shisho kutsi inkondlo inatingaki tindzima, imigca, emagama kulowo nalowo mugca. Iphethini ingaba ngulehlelekile nobe lengakahleleki. Sitsi ihlelekile uma imigca kuleyo naleyo ndzima ilinani lelilinganako.

Tindzima

Indzima yenkondlo shisho linani lemigca lelilandzelanako libumbe umcondvo munye. Tindzima tenkondlo tehlukanisa imicondvo leyehlukene kepha lenekubumbana.

Sibonelo

Inkondlo letsitsho Lilanga inetindzima letine, indzima ngayinye inemigca lesihlanu, umugca ngamunye unemagama lasukela kulamabili kuya kulamane.

Imigca

Inkondlo ibhalwe yehluka kuleminye imibhalo, inemigca lehlelwé ngendlela leyehlukile kunaleminye imibhalo. Lemigca ngiyo leyakha indzima.

Emagama

Emagama lakha inkondlo abalulekile ngoba akhombisa kutsi sonkondlo uphumelele kanganani kuveta umcondvo wayo ngeemagama lambalwa. Linani lelincane lemagama liveta bunkondlo. Uma sekamanyenti sekuba ngatsi yiprozi.

Yini imvumelwano enkondlwéni?

Imvumelwano buciko bembongi bekuphindhaphindza emalunga ekucaleni, emkhatsini nasekugcineni kwemugca ngenhloso yekugcizelela umcondvo lotsite nobe kuletsa sigci enkondlwéni. Kunemvumelwano sicalo, imvumelwanomkhatsini, imvumelwanosigcino.

Asinake: Yonkhe imvumelwano iyeca, seca munye umugca.

Imvumelwanosicalo lena yimvumelwano letfolakala ekucaleni kwemugca.

Sibonelo

Ngivumele ngigacatele ngemadvolo

Ngikhasele elangabini lakho
Ngikuphe lingekhatsi lenhlitiyo yelutsandvo

Lomfundvo

Imvumelwanomkhatsini itfolakala emgceni munye lapho emagama lasemkhatsini
agcina ngemalunga lafanako.

Sibonelo

Engcondweni,enyameni nasemphefumulweni
Ngikhatsatekile,ngijabhile kepha ngilindzile
Ngalelinye lilnga ngitakubona mbali yami.

Imvumelwanosigcino
Lena yimvumelwano letfolakala ekugcineni kwemugca, nayo ngalokunjalo iba lilunga
nobe emalunga. Kuyo inkondlo lets Lomfundvo sitsandvwa sami.

Sibonelo

Ngikuphe lingekhatsi lenhlitiyo yelutsandvo
Ngikuphe lingekhatsi lekujula kwengcondvo.

Ngihole mgudvu wenhlananiph
Ngihambe ngemvila wenhloniph

Luchumano

Luchumano lusu lekuphindwa kweligama leliphelele emigceni lemibili nobe
lengetulu endzaweni lelandzelanako. Lokuphindwa kwaleligama kungaba
sekucaleni emkhatsini, nasekugcineni kwemigca lemibili yenkondlo. Sibonelo
sitsetfwe kuyo inkondlo lets Lomfundvo sitsandvwa sami.

Lebhalwe ngu NP Mabaso likhasi 11 Kuphuma Kwelilanga.

Luchumanosicalo

Ngikuphe lingekhatsi lenhlitiyo yelutsandvo
Ngikuphe lingekhatsi lekujula kwengvondvo.

Ngivumele ngikhaget'impilo
Impilo yekujula kwemphilo
Impilo yenjula yekuphila
Luchumanosigcino

Sibonelo

Ngivumele ngikhaget'impilo
Impilo yekujula kwemphilo

Luchumanomkhatsini

Loluchumano lutfolakala emkhatsini yemigca kusigaba sinye
Sibonelo
Ngikuphe lingekhatsi lenhlitiyo yelutsandvo
Ngikuphe lingekhatsi lekujula kwengcondvo.

Luchumanololutjekile

Loluhlobo Iwekuchumana luvela ngekutsi ligama lekugcinwe ngalo emgceni longenhla kubuye kucalwe ngalo emgceni lolandzelako nobe kucalwe ngalo emgceni wekucala kugcinwe ngalo emgceni wesibili.

Sibonelo

Ngivumele ngihlobe
Ngihlobe ngihlomise sive.
Ngivumele ngikhanget'impilo
Impilo yekujula kwemphilo

Naka: lonkhe luchumano luyeca, seca umugca munye.
Yini umehluko lokhona kumvumelwano neluchumano?
Luchumano kuba ligama leliphelele, imvumelwano kuba lilunga nobe emalunga,
hhayi ligama leliphelele.

Yini i-enjambamenti nesidvonsamoya?

Ienjambamenti(Sicedzelelamcvondvo)
Sonkondlo ubhala inkondlo yakhe imigca ilandzelana ngaphandle kwekusebentisa tiphumuti. Kulesinye sikhatsi angasisebentisa siphumuti kepha lomcondvo uphelele emgceni lolandzelako. Loku ukwentela kukhomba kutsi umcondvo losemgceni longenhla uphelela emgceni lolandzelako. Ngiko kutsiwa sicedzelelamcondvo.

Sidvonsamoya (isuzuri)

Sitfolakala lapho sonkondlo asebentisa tiphumuti emgceni, kungaba lisu lekuphumula, uhlabe likhefu, nobe kuletsa sigci enkondlwani

Enkondlwani lets iinkhundla iyashiyelwana Mabaso Np pg 35
Gudluka mnaketfu, gudluka
Kadze kwas"uhleti kuleso sihlalo,
Sewuye wamila netimphandze,
Kuleso sihlalo, kuleyo nkundla bo

Inkhundla iyashiyelwana Mabaso N.P likhasi 35 Kuphuma kwelilanga.

Sifanamsindvo

Lapha sikhulumu ngemsindvo lowentiwa tinhlavu temagama emgceni, Lemisindvo yenta sigci lesimnandzi. Lemisindvo ingaba wabongwaca nobe bonkhamisa.

Sifanangwaca

Lomsindvo udalwa kuphindzeka kwabongwaca labafanako emgceni munye
Sibonelo enkondlwani lets Ngikhoselise JJ Thwala (likhasi Kuphuma kwelilanga)
Lapho tiphepho letiphephulako
Tisiphula timphandze tetihlahla

Sifanankhamisa

Lomsindvo uvela ngekuphindzaphindza nkhamisa lofanako emgceni munye.

Sibonelo
Nklihhh! Nklihhh!

Khilikitsela nabo etikhiliksini.
Mgalafawu NP Mabaso Kuphuma kwelilanga likhasi
Yini imphindvwa, imphindza, nemphindzamcondvo, kune kwehluke ngani kulokunye

Imphindvwa

Kuleso naleso sigaba sonkondlo ucala nobe aphetse ngemugca lofanako.

Sibonelo

Enkondlweni lets Mgalafawu, NP Mabaso likhasi 32 Kuphuma kwelilanga sonkondlo ucala tonkhe tindzima ngemugca lotsi Nkliehhiihi! Nkliehhiihi

Enkondlweni lets Bewutawutsini indzima yekucala neyesitsatfu icala ngeligama lelitsi bewutawutsini. Lebhalwe ngu J Stoltz likhasi 41 Kuphuma kwelilanga

Bewutawutsini

Imphindza

Lona ngumsindvo lofanako emgceni munye sibonelo sitfolakala enkondlweni lets Nyawo Iwami. Indzima yesibili

Nyawo! Nyawo! Nyawo Iwami.
Wabukek" ukhala yni?
Ngab" ubulawa ticatfulo?
Pho ngabe yni?

Yini lekumele bayati bafundzi nabahluta inkondlo?
Bafundzi kumele bati luhlobo Iwenkondlo, lokushiwo yinkondlo, kujula kwenkondlo, ingcikitsi, umoya,sakhiwo sangaphandle,nesakhiwo sangekha
Sitawukhumbutana kafishane ngetinhlobo tetinkondlo, sifundze ngalokushiwo yinkondlo, kujula kwenkondlo, ingcikitsi, umoya kanye nesakhiwo sangekhatsi.

Tinhlobo tetinkondlo.

Bafundzi kumele bati kutsi inkondlo ngabe iyisonethi, ilirikhi, isathaya, inkondlosililo, inkondlomlandvo, inkondlo yetenkholo, inkondlo yesimanje nalelandzisako.

Lokushiwo yinkondlo

Lapha sisuke sikhuluma ngemcondvo losebaleni, utfolwa nobe ngubani lofundza inkondlo ngoba asijuli, sichaza sisebentisa inshokutsi lesebaleni yemagama. Sibonelo inkondlo lets Makoti. Umcondvo losebaleni kutsi kukhulunywa ngamakoti lotawendza, kumele ente konkhe lokwentiwa bomakoti labendzile.

Umcondvo lojulile

Nasikhuluma ngemcondvo lojulile, sikhuluma ngemcondvo lofihlakele, kute sitfole lomcondvo kumele sicabange sjule, lokujula kwetfu kumele kuhambisane nalamanagama lasetjentiswe enkondlweni. asinhlanhlatsi. Sibonelo, Kulenkondlo lengenhla, nasijula sitawusho kutsi kukhulunywa ngemfundvo,

Ingcikitsi

Ingcikitsi nguloko lokususe sonkondlo phasi kutsi abhale lenkondlo. Uma sewufundze konkhe lokusenkonlweni wena ubese usonga ngeligama linye lelisembulelo kutsi lenkondlo ingaloku, njengemfundvo, intfutfuko, itheknoloji, tikhali, tigitjelwa, umnotfo njll.

Umoya wenkondlo

Umoya wenkondlo usho lasuke lakuso sonkondlo uma abhala lenkondlo. Ngabe uyibhale achutjwa yinjabulo, kukhatsateka, lusizi. Yindvumiso, kudvumala njll

Tinongo tenkhulumo

Tinongo tenkhulumo ngito letisakhela imifanekisomcondvo titfombe letakheka emcondvweni wetfu ngekufundza emagama latsite Singahogela, sinambitse, sibone, sive, sifise kutsinta ngenca yesitfombe lesakheke emicondvweni yetfu. Tiyagcizelela nobe tente intfo siyibone kancono siyivisise.Umfundzi kumele akhone kusho kutsi mfanekisomcondvo muni loletfwa sinongo lesitsite. Nati tibonelo: Sifaniso- kufaniswa tintfo letimbili letehlukene kube kunebudlewano lobutsite emkhatsini wato,

Sibonelo

Lamuhla ngikhala sililo safutsi
Ngikhala ngitithulisa njengentsandzane.

Lamuhla sewuyatisola ngami
Ungilahlisa kwentfo lengenalutfo.
Waze wangikhohlisa

sifanisongco-Kufaniswa tintfo letimbili letinetimphawu letifanako.
Sibonelo : Enkondlweni lets Mphandze yesono, imali ifaniswe ngco neMphandze yesono, ngoba vele konkhe lokubi kuvela kuyo.
Maye simnandzi lesishwala
Wotani maSwati nitewukudla lesishwala
Tintfombi nemajaha wotani bo
Wotani nitewukudla lesishwala simnandzi bo.
Imfundvo ifaniswe ngco nesishwala.

Simnandzi lesishwala X.L Ntuli likhasi 10 Kuphuma kwelilanga

kumuntfutisa, Intfo lengaphili inikwa tento nobe titfo temtimba temuntfu.
Kuyo inkondlo lets mphandze yesono, sonkondlo unike imali tento tebantfu, ngako uyimuntfutisile

Kunini Mphandze yesono
Ubatfokotisa, ubabajhise
Ubabusisa ubacalekise
Lokutsandzako uyamtondza
Lokutondzako uyamtsandza

Impandze yesono J.J. Thwala Kuphuma Kwelilanga likhasi 33
Sifutamsindvo ligama leliveta umsindvo lovetwa nguloko lokwentekako
njengajulenkondlo lets Lulaka Iwemvelo

Phohlo phohlo emabhuloho
Hliphi hliphi tindlu
Hhovo hhovo tindlela tebantu

Lulaka Iwemvelo EE Shabangu (likhasi 22 kuphuma kwelilanga) kwenta sasilwane-kunika intfo tento nobe titfo temtimba tesilwane.

Sibonelo uma kufa singatsi kunetidlada netinziphho leticijile neludvonsi,
sisuke sikunika timphawu tebulwane loko sitsi kwenta sasilwane.
sihabiso -kubeka intfo ngendlela leyenta ibukeke iyinkhulu nobe iyimbi sibonelo:
Inhlitiyo yami iyopha njalo nangikhumbule wena mntfwanakitsi.

Ngicolele ME Masina likhasi 30 kuphuma kwelilanga.

Lapha sonkondlo ukhombisa kutsi inhlitiyo yakhe iva buhlungu lobukhulu kakhulu
hhayi kutsi iphuma ingati. Uhabisile kute agcizelele lobuhlungu.

Inhloniphо- usebentisa ligama lelimnadzi lelikhomba inhloniphо. Ligama lelitsi
emadliz lihloniphisa lelitsi emathuna/emangcwaba.

Wo hhe! Kwami kwetandla
Ngilala benyoni
Kulelifihe inongwane yami
Lelifukamel' emadliza alabadzala.
esikhundleni salelo lelihlabako.

Benyoni ,J.J.Thwala likhasi 37 kuphuma kwelilanga
Secamagama- lapha kweciwa emagama ngenhoso yekuveta bunkondlo.
Wo kwami kwetandla ngilala () benyoni(Kweciwe ligama butfongo)
() Kulelifihe inongwane yami (kweciwe ligama live)
kucatsanisa-lesi sinongo lesibeka emagama abukane kute kuvele
umehluko emkhatsini wawo. Enkondlweni lets *Mphandze Yesono J.J. Thwala*
Kunini Mphandze yesono
Ubatfokotisa ubabajhise,
Ubabusisa ubacalekise?
Lonawe ukhala siilo
Lokweswele ukhala sililo
Lokutsandzako uyamtondza
Lokutondzako uyamtsanda.

Mphandze yesono JJ Thwala likhasi 33 Kuphuma kwelilanga

Umbiti, Kukhuluma nentfo lengaphili kungatsi iyaphila enkondlweni lets
Mgwenya utsini ME Masina likhasi 13-14 Kuphuma kwelilanga? Kunemibuto lebutwa
umgwenya kungatsi utawuphendvula”
Mgweny”utsini ngikhala?
Utsi ngitsini kodywa Mgwenya?
Mgweny”utsini nawubutwa?

Siphukuto- kubeka emagama ngendlela lehlaneketelako, njengekutsi wafundza
kakhulu kungako asebenta emakhishini. Lapha kubekwe ngendlela

Iehlaneketelako ngoba angeke ufundze kakhulu bese ugcina usebenta emakhishini ebantfu.

Lokumele kwatiwe ngumfundzi nakatawubhala ngenkondlo lefundziwe nobe lengakafundvwa eklasini.

- Kumele ati luhlobo Iwenkondlo
- Kutsi inkondlo ikhuluma ngani.(Umcondvo losebaleni)
- Kujula kwenkondlo (Umcondvo lofihlakele)
- Kubona uhlute bunkondlo lobutjentisiwe ekondlwensi.
- Kubumbana Kwenkondlo nesihloko/ kubumbana kwesihloko nengcikitsi
- Luhlobo Iwesinongo senkhulomo nekusetjentiswa kwaso ngemphumelelo.
- Kubeka umbono wakho ngengcikitsi
- Kuhluta nobe kuhlatiya kusetjentiswa kwemagama latsite ngemphumelelo.
- Simongcondvo senkondlo nekukhetseka kwemagama. Ucabanga kutsi sonkondlo
- ulisebentise kahle leligama lelitsite nawubuka simongcondvo salenkondlo.
- Umoya wenkondlo
- Chaza emasu lasetjentiswe ngusonkondlo ekwetfuleni ingcikitsi.
- Ufuna kusitjela ini sonkondlo ngekusebentisa emagama latsite.
- Bhala sonkondlo lasetfulele kona kulenkondlo nemasu lawasebentisile.
- Indlela ingcikitsi lehambelana ngayo nemphilo yetfu yalalamuhla.
- Hluta ligalelo lekukhetfwa kwemagama, imifanekisomcondvo,(tinongo tenkhulomo
- tisho netaga)tinsita temsindvo letitsintsa ngayo umoya inshokutsi kanye nengcikitsi.

Kuhluta inoveli

Singeniso/setfulo

Lapha setfulelwa indzawo kanye nesimo leyenteka kuso indzaba.

- Setfulelwa umlingisi lomcoka neninga lacondzene nayo.
- Setfulelwa ngesimo, simo nasepolitiki nesimo.
- Simo sendzawo-yindzawo lenjani, lesemakhaya, lesemadolobheni, letfutfukile nobe lete intfutfuko.
- Simo senhlalo-lapha setfulelwa kutsi kuhleliswene njani, kanye nesimo setembusave.

Siphindze sitfole Iwati ngesimo sesikhatsi; ngabe indzaba yenteka ngesikhatsi sakadzeni kusete imphucuko, nobe yenteka manje sekugcwele imphucuko, ngabe yenteke emini nobe ebusuku, ngabe yenteka ehlobo nobe ebusika konkhe loko kuchaza simo sesikhatsi.

Singeniso kumele sibe ngulesihehako kute setsamelilwati sitawuba nelilukuluku lekufundza.

Ludvweshu

Ludvweshu kulapho lokwentekako sekucala kucangana. Balingisi bayaye bangaboni tintfo ngeliso linye; nobe umlingisi uyaye abe nemicondvo leminyenti lephikisanako

netincumo lekufanele atitsatse. Loku kusinika tinhlobo letimbili teludvweshu: Ludvweshu Iwangekhatsi nelwangephandle.

Ludvweshu Iwangephandle kulesikhatsi kunekungaboni ngalokufanako kubalingisi lababili nobe labangetulu kwalababili. Ludvweshu Iwangekhatsi kulapho umlingisi anemicabango leshayisanako ngekhatsi kwakhe uma kufanele ente tincumo letitsite.

Sicakacaka

Sicakacaka sibonakala lapho indzaba seyiphakamela esicongweni. Tintfo tisuke seticangene kakhulu sekunesidzingo sesisombululo. Naletisombululo tisuke setitinyenti, setsamelilwati sesitibuta kutsi ngabe kuyawuphumelela sippi sisombululo senkinga.

Luvutfondzaba

Kulesigaba lesi kuphendvuleka umbuto nobe imibuto lebesinayo esicakacakeni. Kuvela sisombululo. Indzaba isuke seyisecophelelweni lelisetulu seyimnandzi kakhulu.

Siphetfo

Indzaba ayipheleli esicongweni kepha iyachubeka ifike esiphetfweni. Lokubalulekile kutsi timbadlwana tindlela tekubhala siphetfo. Siphetfo kufanele sisheshe sifike singeluli, asilandzele masinyane nje emva kwesicongo nobe luvutfondzaba. Siphetfo lesikahle ngulesishiya umfundzi asale aticabangela lokwaldzelauma kusonjululwa inkinga nobe sivete loko umbhali langakakulindzeli. (ingwijikhwebu). Kufanele siphetfo singashiyi umfundzi advumele nobeasangene nobe angenayo imibuto.

Hlahlela indzima yembhali

Umfundzi kufanele ati kutsi umbhali uyachumana ngandlelatsite nalokulakubhalile. Lokuchumana kubonakalisa imiva nemibono yakhe kephakumatima kwenta loko. Sikhona kubona imiva yembhali ngenhlobo yemlandzi lamkhetsileekwetfuleni umsebenti wakhe. Umlandzi nguloyo lesiva ngaye lendzaba. Umbhali angakhetsa kuba ngumteki wendzaba lowati konkhe lokwentekako, nobe abe ngumlandzi longulokhulumako, nobe abe ngumlandzilongumabona nhlangotsi tonkhe. Ligama lelitsi umlandzi licuketse umbhali nobe lendlela umbhali lakhetsekungenisa ngayo umsebenti wakhe. Kutawuchazwa letinhlobo nebalandzi kafishane

Umlandzi longusatikhonkhe

Lomlandzi lona ujati kutsi umlingiswa ngamunye ucabangani futsi uvanjani, watu konkhe lokwentiwa ngumlingisi.

Lomlandzi wenta umfundzi akhone kwati ngabo bonkhe balingisi. Umsebenti wasatikonkhe kwehlukanisa balingisi kute bangafanani.

Umlandzi locishe angusatikonkhe

Lapha umbhali usebentisa lomunye webalingiswa kutsi kube nguyelococa indzaba. Kuvamise kuba ngumlingiswa logcamile. Usitjela ngemiva yakhe nemicabango nemizindlo yalabanye balingiswa.

Sibona labanye balingiswa ngaleliso lalomlingiswa lona. Umfundzi uyayeamvele lomlingiswa lona. Alusetjentiswa kakhulu eSiswatini loluhlobolwemlandzi.

Umlandzi longumuntfu wekucala-lokhulumako

Umteki ungułomunye webalingiswa, ucoca yonkhe lendzaba. Indzabaigcwele tivumelwano leticondziswe kuye bo “Ngi” “mine” “si” “tsine.”

Lendlela lena iletsa simo sekutsintsana ngco nesimo salokwenteka endzabeni.

Umteki longumabonanhlangotsi tonkhe

Lapha indzaba icocwa ngekuvele wetfule tehlakalo umbali angangenikubalingiswa futsi angasebentisi umlingiswa loyedvwa. Cishe yindlelalelukhuni ledzinga buchwepheshe.

Umbiki

Lomlandzi lona akateki uyabika; akanalo likhono lekubona nhlangotsitonkhe. Umfundzi uyeva kutsi kukhona umuntfu lonitjela lokwentekako. Iyadvumatana lendlela lena yekubika ngoba lomlandzi akanikiumfundzi litfuba lekuticabangela, ubese uyangena afake imifako nalapho kungadzingeki khona.

Simonhlalo nesimo setepolitiki ematheksthini

Umfundzi kufanele akhone kuchaza kutsi kuhlalismene njani emimangweni letfolakala ematheksthini. Simo setembusave nobe ipolitikisiyahambelana yini naleso lesenteka emimangweni yetfu. Ngabe kuyaliwa, kubangwa tikhundla, kuyabandlululwana, kuyavotwa njalo njalo, kukhetfwa mengameli nobe kuyakhankhaswa.

Hiola tincumo tembhali netiphethfo aticatsanise netakhe

Umfundzi kufanele akwati kuhlola kutsi umbali uyephethse ngendlelalefanele yini inoveli yakhe ngekulandzela timiso tetiphetfo letemukelekile. Umfundzi ubese ubeka umbono wakhe kutsi kube yena bekangumbhalibekangayiphetsa njani lenoveli asekele iphendvulo yakhe.

Hiola sendlalelolwati nesimonhlalo sibekanzaba nendlela lesingatsintsana ngayo nemlingisi nobe ingcikitsi

Sendlalelolwati siyahambisana nengcikitsi kanye nemlingisi.

Ingcikitsi ngumgogodla wendzaba, nguloko umbali lafuna kubhala ngako, njengekutsi bantfu bakulendzawo layikhetsile baphila njani kuleso simolafuna kuhuluma ngaso.

Esikhatsini lesinyenti indzawo lesikhulela kuyo iba nabo budlelwano naloko umbali lafuna kubhala ngako. Similo semlingisi, netento takhetiba ngumphumela wendzawo lakhulela kuyo nesikhatsi lakhula kuso. Ngulobo budlelwano lobukhona emkhatsini wemlingisi nesendlalelolwati. Tintfo lotawukhuluma ngato umbali kufanele tihambelane nesikhatsi, kungabi yintfo leyenteka kadzeni kepha umbali abe asebentisa tintfoletikhona kulesikhatsi salamuha.

Umfundzi kufanele anike tiphakamiso takhe ematheksthini

Umfundzi utawunika wakhe umbono ngesitatimende lesitsite lesitfolakala enovelini bese seyawusekela lombono wakhe. Kulesinye sikhatsi utawucelwa kutsi aphawule

kutsi sitatimende lesitsite ngabe singumbononobe singemaciniso esekele lesiphakamiso sakhe.

Humusha simo semoya, sikhatsi kanye nengwijikwebu etiphetfweni Umfundzi kufanele akhone kuwubona umoya lokhona enovelini, ngabengumoya wenjabulo, welusizi, wekukhutsata, nobe wemphumelelo. Sikhatsi kumele sichubekele phambili sitfutfuke singemi ndzawonye. Njengoba kwenteka emphilweni siyachubekela yini kuleliye lihora, lusuku, liviki, inyanga, sikhatsi semnyaka njalo njalo. Ngabe lokwentekakokuyahambelana yini netigameko, ukhona yini umehluko uma ucatsanisanesikhatsi salomuhla.

Umfundzi kumele akhone kuhlola kubhaleka kahle kwetiphetfo, ikakhululeto letiyingwijkhwebu nobe leto letikushiya nembuto, hhayi leto letiveletikwente ubete longakubuta, indzaba iyaphela nje khona lapho.

Hiola umehluko emkhatsini wenshokutsi lesebaleni lebhacile

KuTemibhalo kuvamile kutsi kube nenshokutsi lebhacile nalesebaleni. Umfundzi unikwa inshokutsi lesebaleni kufuna atfole leyo lebhacile. Lokukuvame uma kusetjentiswa tinongo tenkhulumo njengesifaniso, sifanisongco, imifanekisomcondvo netigamekotiphukuto nalapho emagama emlingisi asho imicondvo lemibili kepha umlingisi yena abeangawati lolomunye umcondvo, ubonwa ngolowo lofundzako kuphela.

Emasu ekuveta balingisi

Balingisi babaluleke kakhulu enovelini ngoba ngibo labenta sikhonekutfola ingcikitsi, tifundvo kanye nemilayeto lafuna kuyendlulisa kitsiumbhali. Ngibo labenta ingcikitsi ivele ebaleni ngetento tabo.

Manyenti emasu lasetjentiswako kepha kumele ente balingisi labakholwekako. Labakwentako, abakushoko akuhambisane nendzawo labaphilakuyo kanye nesikhatsi labaphila kuso.

Umbhali angasitjela yena kutsi umlingisi ungumuntfu lonjani

Umbhali angasebentisa lendlela yekusitjela ngesimilo semlingisi, angamniki umfundzi lituba lekucagela. Uvele atsi Mphikeyeli walunga, kungadzingi kutsi ente intfo letsite Mphikeyeli lesikhombisa kutsiulungile. Lena akusiyo indlela lencomekako ngoba phela ifunta umfundzingelwati.

Bangavetwa ngetento tabo

Lendlela lena ikahle ngoba tintfo labatentako labalingisi nguleto letentiwabantfu labaphilako. Umfundzi uyawati emagugu emmango naletu tintfoummango longativumeli kutsi tenteke. Ngalolu lwati siyakhona kuhluta kutsi umlingisi ungumuntfu lonjani ngekubuka tento takhe kutsitinguletemukelekako nobe atemukeleki.

Tembatfo tabo

Timphahla lesitigcokako tikhuluma lokunyenti ngemphilo yetfu. Yonkheindlela yekugcoka iyaye imataniswe neluhlobo lolutsite lwebantfu nobeindlela yekutiphatsa nobe yekuphila. Ngekubuka timphahla, uyakhonakubona kutsi umuntfu unemali, uphuyle, ulandzela nkholo yini, usebentaini, uzitsile, ukusiphi sigaba sekukhula. Umbhali uyatisebentisa timphahlakusivetela balingisi.

Kubetsa emabito

Emabito etfu anemvelaphi letsite futsi kuvamisile kutsi umuntfualilandzele libito lakhe uma sekakhulile. Kungako batali kufanelebacaphele uma betsa bantfwana emabito. Leli lisu umbhali langalisebentisa kuveta balingisi.

Indlela labadlala ngayo

Badlali bangavetwa ngetikhundla labatidlalako kanje:

- Bangiswako – nguloyo lobangiswa lokutsite enovelini.
- Imbangi – nguloyo lobangisa bangiswako
- Umkhweteli – nguloyo logcugcutela incabano
- Umlamuli – nguloyo loletsa kuthula emkhatsini wembangi nabangiswako.
- Mphacambili – nguloyo lotfolakala angumngani wembangi aphindzeabe ngumngani wabangiswako, kahle kahle akatati kutsi umephi. Kulesinye sikhatsi uyatati kutsi umephi kepha usuke ayekuva sifubasabangiswako kute ayewukwatisa imbangi, kuye ngekutsi ngumuphilamtsandza kakhulu.

Indlela labadlala ngayo

Balingisi abafani njengoba bantfu bangafani emphilweni. Kunebantfulabangantjintji indlela labacabanga ngayo, kusukela ekucaleni kwemphiloyabo kute kube sekugcineni, bese kuba khona labo labahambe baguculeimiconvo yabo ngoba seafundze lokutsite emphilweni. Siba netinhloboletimbili tebalingsii.

- Losicaba – ngumdlali longagucuki
- Loyindilinga – ngulogucukako.

Labakushoko labanye ngawe

Uma ufunu kwati kabanti ngemunfu uyaye ubute labo labahlala naye. Kanjalo nembhali uyaye atsatse labalingisi labanye abafunte inkhulumiswano bavete lokutsite ngemlingisi ngoba baphila naye.

Lokubalulekile uma ufundza inoveli

- Hlola kubumbana kwesihloko nengcikitsi.
- Hlola sendlalelolwati nesimonhlalo (sibekandzaba) lesingahambelana ngaso nemlingisi nobe nengcikitsi.
- Sendlalelolwati singakufaka enkingeni. (Bangani bakho nebantfu lohlala nabo emmangweni bakwenta ube nguloku longiko. (Bangani bothishela bafundzisi, batali.)
- Humusha simo semoya, sikhatsi ingwijikhwebu netiphethfo.
- Umoya ungaba weludlame, wekukholwa, wekuhlukubeta.
- Sikhatsi Sikhatsi emdlalweni siyatfutfuka. Umgamu wesibili, Inyanga yenNgci
- Fundza ngesakhiwo. Sibekandzaba (sikhatsi, indzawo, simo senhlalo (tepolitiki) Ludvweshu, luvutfondzaba, lupholavutfondzaba, lubohlo siphethfo (ingwijikhwebu) Sisombululo bese siba sinye.
- Umlayeto nesecwayiso
- Sifundvo

Temdzabu

Tinhlobo Tetinganekwane

Tinganeko

Inganeko itsintsa inkholo kanye naNkhulunkulu noma Mvelinchanti. Inganeko isitjela imvelaphi yebantfu netintfo letitsite. Balingisi kubabantfu netilwane.

Tinsumansumane

Luhlobo Iwenganekwane loludze kunaletinye. Balingisi bantfu labake baphila emazimu ladla bantfu netilwane letikhulumako letitiphatsa njengebantfu.

Ematekelo

Luhlobo Iwenganekwane lolusamlandvo ngoba lugcila emlandvweni webantfu, tintsintse netigameko letake tavelela bantfu kuleso sive, tiba nekungakholweki ngoba sitfoa tilwane letikhulumako. Kulesinye sikhatsi kuyaye kukhulunywe ngebuchawe bemakhosi netintfo lebetentiwa tive letitsite.

Tinsumo

Tinganekwane letikhuluma ngetilwane kuphela, ayitsintsi bantfu. Imfishane kakhulu .Tilandzisa kutsi kwaya ngani leso silwane sibe njengoba sinjalo.

Tinganekotilwane

Tikhuluma ngetilwane. Letilwane titiphatsisa kwebantfu, tiyakhuluma, tente tintfo letentiwa bantfu. Tisilandzisa ngemvelaphi yetici letitsite etilwaneni noma umkhuba lotsite letiwentako.

Tifundzelwani tinganekwane

- Kufundzisa
- Kutfutfukisla lulwimi ngoba nasicoca sisibentisa Iwimi. kwenta umcondvo wakhe ukhone kukhumbula, nekutsi akhone kucocela labanye
- Kujabulisa bantfwana

Sakhiwo senganekwane

Setfulo

Setfulo kumele sibe sifishane, sicoceke, sihehe sinembe. Loyitekako akangatsemeleti.

Balingisi

Baba mbalwa,

Kungaba bantfu nobe tilwane

Sikhatsi nendzawo

Akwatiwe kutsi yenteka kuyiphi indzawo (edolobheni emakhaya, ehlazzeni, enkhangala njll), ngasiphi sikhatsi(ekuseni, emini, entsambama) ngasiphi sikhatsi semnyaka (ebusika ehlolo njll)

Ludvweshu

Nasikhuluma ngeludvweshu sisho kushayisana kwemibono, imicabango netento tebantfu. Uma kushayisana ngusemkhatsini webantfu lababili sitsi ludvweshu Iwangaphandle, uma kusemicabangweni yemuntfu sitsi ludvweshu Iwangekhatsi. Lubalulekile ludvweshu ngoba Iwenta inganekwane itfutfuke iye phambili.

Sicakacaka

Loludvweshu loluchazwe lapha ngenhla ngilo lolubanga kutsi kube nesicakacaka. Lokungashayisani kwemibono kwenta kutsi kubente umlingisi logobako ehlise umoya, nguloyo uba nelisu lakhe lekusombulula inkinga. Kute lotifobako avume kutsi lowakakhe umbono, tento ngito letikabi letibanga kungevani.

Luvutfondzaba.

Sicongo sendzaba lesi. Inkinga lesenganekwaneni isuke seyisetulu seyidzinga sisombululo.

Kuvela kutsi ngubani lophumelelako nalohlulwako.

Lupholavutfondzaba

Tinkinga tisuke seticatululiwe. Imibuto lebesinayo ngekutsi kutakwentekani isuke seyinetimphendvulo. Sekute lwati lolusha lesiludzingako.

Siphetfo

Silindzeleke kutsi sibe sifishane, sicoceke. Kuvela lokunyenti ngemlingisi.

Inganekwane singabuye siyihlute ngaphasi kwanati tihloko letilandzelako:

Insweleko

Yintfo leswelekako, ledzingekako

Likhambi lensweleko

Kulapho sekutfolakala lobekuswelakele

Umyalo

Kuba nemyalo labanikwa wona njengendlela yekuphila kuleyo ndzawo kutsi bente nobe bangenti lokutsite.

Kwephulwa kwemyalo

Kuvamile kutsi umyalo ulandzelwe nobe ungalandzelwa. Uma kunalabangalandzeli umyalo, loko sitsi kwephuka kwemyalo.

Sijeziso

Sonkhe siyati kutsi uma umunfu ephula umyalo kumele ajeziswe ngandlela tsite. Loko labakwentako uma ephule umyalo kutsiwa sijeziso.

Imibuto longayilindzela

1. Yini tinganekwane?
2. Nika tinhlobo tetinganekwane, uchaze ngalunye ngalunye luhlobo.
3. Nika tizatfu tekutsi bantfwana bacocelwe inganekwane
4. Hluta tinganekwane lotifundza lonyaka ngaphasi kwaletihlokwana
 - a. Sikhatsi nendzawo
 - b. Ludvweshu
 - c. Sicakacaka
 - d. Luvutfondzaba

- e. L upholavutfondzaba
 - f. Siphetfo.
5. Khipha loku lokulandzelako enganekwaneni leniyifundzako lonyaka:
- a. Insweleko
 - b. Likhambi lensweleko
 - c. Umyalo
 - d. Kwephulwa kwemyalo
 - e. sijeziso
 - f. sifundvo

Tiphicaphicwano

Luhlobo lwemdlalo lolungadlalwa ngulabancane nalabadzala

Tibaluleke ngani tiphicaphicwano

Tenta emalunga emndeni abumbane

Tifundzisa kutiphatsa kahle

Tibonelo

- Ngikuphica ngenkhomo yami lebovu lehlala esibayeni lesimhlophe.
- Ngikuphica ngemfati wami lotsi angagidza agidza bese uhlala emsamo.
- Ngikuphica ngemuntfu wami lomkhulu lohamba abhodla.

Tisho

Atisiyo imisho lephelele

Tigucuka netikhatsi tesento

Imicondvo yato ilula kunaleyo yetaga

Tifaka yonkhe incenye yemphilo yemuntfu.

Atigucuki tisetjentiswa tinjalo

Tibonelo

- Kubamba longentasi (kumangala)
- Kubangwa netibi (kugula kakhulu)
- Kubuka ngewayitolo (kungalali)

Taga

Taga ngemavi lakhombisa buciko bekusho intfo letsite ngemavi lashubile, lakhombisa kuhlakanipha. Alulwimi lolunotsile lolusho umcondvo lophelele ngemavi lambalwa.

Tibaluleke ngani taga?

- Tikhomba kututufuka kwelulwimi
- Tikhomba kunotsa kwelulwimi.
- Tisebentisa imisho lemifishane lefinciwe.

Tibonelo

Ingwe idla ngemabala. Umuntfu utenta yena ngemisebenti yakhe lemihle kutsi atsandzeke. Intsandzane lenhle ngumakhotfwa ngunina. Umntfwana uphila kahle uma usenenina. Umtsentrse uhlaba usamila. Umuntfu ubonakala asemncane kutsi utawukhula abe nesimilo lesinjani.

Tilandzelo

Tinkondlo tebantfwana lesebakhulakhulile
Tivame kuhlatjelelwa enkhulisa nobe emabangeni laphasi.

Imilolotelo

Luhlobo Iwetinkondlo lolubhalelw bantfwana ngenhloso yekubalolotela nobe kubathulisa kutsi bangakhali.

Kubaluleka kwemilolotelo
Kuthulisa bantfwana.
Kugcugcutela umntfwana lofundza kuma.
Kumnika sibindzi sekutsi akhone kutihambela.

Tinanatelo

Tiyini futsi tibaluleke ngani?

Ngemagama lasetjentiswa nakubongwa umuntfu lotsite, tingemagama ebantfu Kucala lesibongo bese kulandzela letinanatelo, akuvami kutsi kube ligama linye, kuvame kutsi abe manyentana, avete umlandvo nebuchawe.
Tiveta umlandvo ngemvelaphi yemuntfu
Tidzambisa kutfukusela kumuntfu lobongwako
Tikhomba kutsi loyo lokhulumako uyasati sibongo sakini

Tibongeleso

Tingemagama lakhomba buchawe bemuntfu
Kungabongwa umuntfu, imoto, tilwane, emakhosi, tindlovukati netimfuyo
letinjengetinkhom
Ticanjwa bantfu batisusela kulodvume ngako
Tinkhomba kujabulelana
Tikhomba buchawe bembongi.

Tibongo

Tigcamisa umlandvo wesive
Tihaywa yimbongi ngembikwekutsi inkhosu Ikhulume uma kunemcimbi

Tibonelo
Khumalo
Mntungwa
Kuhlase
Siwela.

Singwane
Gwazela
Mshika
Hlaba letindvuna ushiye ematfokati khona atewutalelana.

Sakhiwo semdlalo

Setfulo

Esetfulweni sitfola sibekandzaba. Ngaphasi kwesibekandzaba sitfola umdlali lomcoka, nenkinga labukene nayo. Siphindze sibuke simo sendzawo. Sinaka ligama lendzawo, kungaba kusemakhaya nobe emadolobheni. Siphindze sibuke nesimonhlalo sitfola kutsi labantfu bahlalisene njani, bantfu ngabe bayevana nobe bayacabana. Kuphindze kubukwe simo setepolitiki. Ngabe kutembusave kunekuthula nobe kunekungevani. Kuphindze kubukwe simo sesikhatsi. Ngabe lendzaba yenteka emandvulo kusete imphucuko nobe yenteka lomuhla sekunemphucuko, ngabe yenteka emini nobe ebusuku, ngabe yenteka ehlolo nobe ebusika. Konkhe loku kuchaza simo sesikhatsi. Singeniso nobe setfulo kufanele kube ngulesihehako lesenta umfundzi abe nelilukuluku lekufundza. Umbhali usuke ehlulekile uma umfundzi angabi nalo lilukuluku lekufuna kufundza incwadzi.

Ludvweshu

Ludvweshu kulapho sekucala kucabana. Balingisi bayaye bangaboni tintfo ngeliso linye. Nobe umlingisi uyaye abe nemicondvo leminyenti netincumo lekufanele atitsatse. Loku kusinika tinhlobo letimbili teudvweshu. Ludvweshu Iwangekhatsi nelwangephandle. Ludvweshu Iwangephandle kulesikhatsi kunekungaboni ngalokufanako kubalingisi lababili nobe labangetulu kwalababili. Ludvweshu Iwangekhatsi kulapho umlingisi anemicabango leshayisanako.

Sicakacaka

Sicakacaka senteka lapho indzaba seyiphakamela esicongweni. Tintfo tisuke seticangene kakhulu sekunesidzingo sesisombululo. Naletisombululo tisuke setitinyenti, setsamelilwati sesibuta kutsi ngabe kuyawuphumeleta sippi sisombululo senkinga. Kuba netingucuko letitsite etimphilweni tebadlali.

Luvutfondzaba

Kulesigaba lesi kuphendvuleka umbuto nobe imibuto lebesinayo esicakacakeni. Indzaba isuke seyisecophelelweni lelisetulu seyimnandzi kakhulu. Imbangalusizi

Lona ngumdlalo lokhombisa kushuba kwengcikitsi lokukhulunywango, ilets a lusizi netinyembeti. Kukhalelwu umlingisi logcamilengoba usuke ehlulwe tinkinga labekabukene nato agcine eve buhlungu lobukhulu, kulahlekelwa kabuhlungu nobe kufa. Lomuntfu lofako nobe lovelelwu nguletehlakalo letilukhuni akukameli afeleintfo lengakemukeleki emmangweni, njengebugebengu. Kufunasimvele khona kutewudaleka lusizi. Lokuhlupheka kwakhe kufunakubangwe kucinisa inhloko kwakhe nobe kutikhukhumeta.

Imelodrama

Icishe ifane nembangalusizi. Kunelusizi nemunyu nekwesaba. Tibukeli tesabela imphilo yabangiswako. Lokusizi lusuke lungakabalulekikusuke kube nekuhabisa lokutsite kepha tintfo tigcina setimhambelakahle bangiswako.

Senamisi

Kulenhlobo yemdlalo tintfo timhambela kahle bangiswako. Nobekungaba netibumatima lobutsite umdlalo usachubeka kodvwa kubanesiphetfo lesihle. Lomdlalo wenta tibukeli tijabule nobe tename.

Umdlaloncoko

Lomdlalo ugcwele kuhlekisana nemancoko. Uvame kungabi nesakhiwo lesihleleke kahle kusukela esetfulweni kuya esicongweni. Lokubalulekile kutsi konkhe lokwentiwa badlali kube nekuhabisa lokuletsa kuhleka.

Umdlalo wemoya

Umdlalo wemoya ngumdlalo lolalelwako kute lutfo lolubonwangemehlo. Loku kwenta kutsi kungabi nemincele nobe tihibelebetingakhinyabeta umdlalo wasesiteji. Kulenhlobo yemdlalo tingafakwa timoti, tindiza, tilwandle, netinkhomo. Bayakhona bahlelikufaka imisindvo lesitsi uma siyiva sikhewe kutsi kakhona lokulokumelelwe ngulomsindvo. Inkundla yalomdlalo ingaba nobekukuphi njengasemkhatsini, emhlabeni, etitiben i nasekwandle. Kuteumlaleli awutfokotele lomdlalo ingcondvo yakhe kufuna ise bentekakhulu kuhumusha imisindvo iphindze ikhone kutakhela imifanekisomcondvo. Umlingisi ngamunye kakhulu lona lomcokakufanele abe nendlela yakhe lehlukile lakhuluma ngayo nobe lentangayo tintfo. Badlalli kumele bangabi banyenti, kepha awukagcogceki ngeliphuzulesikhatsi. Kubalulekile kutsi sakhiwo silolongeke kahle, nguleso naleso sicephu kufanele siphele esicongweni kute umlaleli atewudvonseka kutsi alalele nakusasa kute atfole kutsi kwase kwentekani.

Umdlalofilimu

Umdlalo filimu siyalalela siphindze sibone konkhe lokwentekako. Kubaluleke kakhulu loku lokwentekako kusaloko lokukhulunywakokangangobe ungakhona kuvisisa kutsi umdlalo ungani ngaphandlekwekuva kutsi badlali batsini.

Umdlalo lofundvwako

Lomdlalo ubhalelw kufundvwwa kuperha ngoba lokwentekako kuwokungele kwakhombiseka esiteji. Tintfo letisetjentiswe kuwo tikhombakutsi lomdlalo ungete wadlalwa esiteji nobe enkhundleni, ulungelekufundvwwa kuperha.

Umdlalo lonkhundlanye

Umdlalo lonkhundlanye ugcogcekile ugcile esigamekweni sinye, kungako unenkhundla yinye nengcikitsi yinye. Badlali bambalwakusukela kulababili kuya kulabasihlau. Ingcikitsi iba yinye futsikumele ihambelane nesimo sendzaba. Sikhatsi sigcogceke kakhulu, konkhe lokwentekako kwenteka elangeni linye.

kufundza umdlalo

Luhlobo lwemdlalo: Senamisi, imbangalusizi, senamisi
Umlayeto lokhona emdlalweni (Sifundvo lositfolako ungafundza)
Ingcikitsi. Hlola nebafundzi kutsi lengcikitsi ivele njani.
Kudlaleka esiteji, kumabonakudze
Kutusa kubhaleka kwemdlalo-Hlahlela umnyakato nenkhulumiswano. Ukhona yini umnyakato kulenkulumiswano.

Fundza ngebudlelwano emkhatsini wemlingisi nendzikimba. Umlingisi uwututfukisa kanganani umdlalo. Sibonelo umlingisi lotsite angalubhebhetskisa ludvweshu. Fundza ngeSakhiwo Sakhiwana. Lapha sibuka setfulo, ludvweshu, sicakacaka, luvutfondzaba, lolpholavutfondzaba nesiphetfo. Nihlola kutsi uphumelele yini umbhali kuveta letincenye tesakhiwo kulomdlalo. (Kuleso naleso sigcawu hlola sakhiwo.

Setfulo

Esetfulweni sibukak simonhlalo, simo sesikhatsi
Inkinga lesibukene nayo
Umlingisi losemcoka

Ludvweshu

Tigameko
Tinhlobo teludvweshu nekutsi lubhebhetska njani

Sicakacaka

Lapha kusuke sekunemasu lamanyentu lahlukahlukene lasisombululo senkinga lekhona. Kusuke sekuhlangahlangene, umfundzi sekatibuta kutsi nguliphi licebo lelitawuphumelela.

Luvutfondzaba

Kusesicongweni semdlalo lapho inkinga icatululeka khona, lapho kuphendvuleka khona imibuto leminyenti umfundzi labesolo atibuta yona.

Siphetfo

Lapho kusongwa khona. Siphetfo kumele sibe yingwijikhwebu nobe sishiye umfundzi anembuto kutsi ngabe kwaphetsa njani.

Kumele kuhlolwe kutsi sakhiwana (*sub plot*) siyahambelana ybni nesakhiwo lesikhulu.

Umbuto: Humusha ubuye uhlole sakhiwo semdlalo.

Kuvetwa kwebalingisi

Balingisi bangavetwa ngetento tabo, kugcoka kwabo, kukhulumu, bunjalo, labakushoko labanye ngabo, umbhali uyasitjela kutsi unguuntfu lonjani nobe ametse libito lelihambisana nebunjalo babo.

Singahlola futsi nendlela balingisi labatutfukisa ngayo umdlalo.

Singahlola futsi bunjalo babo
Usicaba, uyindilinga,

Kudlaleka esiteji Tigcawu, tinkhundla. Inkhundla nobe sigcawu sinato nobe site tintfo letingavimba kudlaleka kwato esiteji.

Inhlosa yesigameko lesitsite. Sentekelani sigameko lesitsite kuleso sigcawu.

Irbuhrikhi ekuhlola indzaba

1. Tiphumuti/Timphawu Tekubhala	(3)	1. Kuticambela	(1 0)
2. Lulwimi lolunongiwe: Tisho, taga, tinongo	(5)	2. Imibono lehambisana nesihloko	(5)
3. Kwakheka kwemisho levakalakako	(5)	3. Khuhleleka (bufakazi bekuhlela)	(5)
4. Umoya/irejista	(3)	4. Kwemukeleka	(1 0)
5. Sipelingi	(3)		
6. Budze	(1)		

Irbuhrikhi yekuhlola imibhalombiko

1. Tiphumuti/Timphawu Tekubhala		1. Kuticambela	
2. Lulwimi lolunongiwe: Tisho, taga, tinongo		3. Imibono lehambisana nesihloko	
3. Kwakheka kwemisho levakalakako		4. Khuhleleka (bufakazi bekuhlela)	
4. Umoya/irejista		5. Kwemukeleka	
5. Sipelingi			
6. Budze			

Tincwadzi letifundziwe

1. Mntungwa N. (2009) *Grade 12 Siswati Study Guide*, Nasou via Afrika: Cape Town
2. Mabaso NP (1994) *Kuphuma kwelilanga Siswati Poetry* Juta and Co Ltd Wetton [Http://erebert.suntimes.com/app/bbcs.dl/article?AID=20060427/REVIEWS/60421](http://erebert.suntimes.com/app/bbcs.dl/article?AID=20060427/REVIEWS/60421) accessed on 8 November 2011.
3. Umlalati unpublished document